



杜光庭廣成集

廣成集卷之一



唐杜光庭撰



代陶福太保脩灑口化請額表

臣某言伏以灑口化者即二十四化之第十八也鄴應配

於小滿列宿應於畢星陳安世白日昇天臺蹤尚在褒女

仙乘車得道轍跡猶存每歲春炁准勅祈醮頃自用軍之

後併已摧殘古殿空壇僅餘基地仙儀像貌盡翳榛蕪往

來絕瞻敬之門仕庶無歸依之所豈期福地一旦蕭條臣

輒備興脩願資聖壽伏惟陛下軒帝靈源緱山仙緒繼天

御極用道臨民萬方榮廣覆之慈三教被維新之澤芝田

柰苑咸荷精嚴古廟儒宮亦蒙繕飾况是長生之教敢申

崇葺之儀旋以剪薙蒿萊興營宇室像設免嗟於暴露簪
冠克遂於焚脩邈彼靈蹤還為勝槩香燈有託齋醮無虧
兼召道士揚玄敬獨孤知元何某等三人就觀居住訖但
以荒涼既久門額全無敢祈雨露之恩特飾神仙之境其
化伏乞聖慈依盡口舊名仍賜給聖壽額許臣自製造懸
挂庶使琅書銀榜長懸日月之輝漢水仙山永祝聖明之
壽臣某無任之至

謝新殿脩金籙道場表

臣某言伏聖旨與右街威儀何冲徽等二十一人於新殿
內修金籙道場七晝夜今月十四日開至二十日散供奉
官揚紹業依時設拜言功表贊訖者伏以天贊聖功鼎新

大內瑤軒玉砌超三島之鼈宮青瑣丹扉逾九清之鳳闕
叶皇居之壯麗觀帝宅之深嚴萬國仰瞻千靈森衛總畢
瓊宮之製先開金籙之壇鋪舒而一：精新祇敬而重：
蠲潔龍香上達依稀而萬聖俱臨蟾月低光彷彿而千真
入會延洪睿筭遐永皇圖近臣拜手以投詞宰輔齋心而
瞻祝殊禎允集巨旣無涯隆大寶於千春總八絃于一統
臣等叨膺科教獲備焚脩豐玉膳於天厨躡雲庭於仙境
兢崇已極頌錫荐臨伏蒙宣賜襯錢銀器疋段等澤深溟
海恩重嵩衡碩慚鷲驚之微何報聖明之獎臣無任之至
謝恩除戶部侍郎兼加階爵表

臣某言伏蒙恩敕除授光祿大夫尚書戶部侍郎上柱國

蔡國公廣成先生者睿慈春煦宸翰雲敷叨榮而但覺逾
涯荷渥而罔知所措臣其中謝臣聞聖明在上是必授任
才能俊乂在官乃貴陳力就列皆以道包經濟言達變通
上有致君之能下盡為臣之節處既得地用務適時苟虧
利物之期必致取容之誚如臣庸懦榮奉休明循頑庸襟
敢臻殊寵伏惟陛下披圖創曆握紀繼天明逾兩曜之懸
德合二儀之普蕩滌氣垢蘇秦襄區功宣而萬有同心化
被而八紘繞指夢通岩壑股肱符命說之求景仰烟波輔
弼契非熊之兆元勳貞佐捧日扶天人傑時英誕星降嶽
青宮翼贊日月重光朱邱忠貞盤維增永臣某江湖賤質
簪褐微才為儒既昧於成麟學道甘期于盡布矧復辭吳

歲久奉聖年深杳無山水之恩每感風雲之會歸棲照育
三十餘秋施重嵩衡遇深溟渤變枯葦為茂草起敗骨為
豐肌徒曰竒功難借聖獎是以臣俯盈丹懇積感皇慈曉
動神魂夜驚形影効報未申於絲髮憂惶空溢於肺肝况
復啟運之初垂裳之始錫峒山之美號加北省之華資無
以身諭國之譚上禪天聰之造膝沃心之議仰副宸衷揣
身世而榮顯居多於爵位而貪饜已極豈可重塵清級更
履殊榮紹碧落之嘉稱集玄闕而瑣質且如漢推曼倩晉
有稚川未聞聯居清重之司再踐非常之秩揣量戰越進
退兢榮仰對宸嚴無階陳讓唯虔砥礪永答鴻恩臣不任
謝恩奉宣每遇朝賀不隨二教獨引對表

臣某言伏蒙聖慈以臣每有起居稱賀皆與道衆僧人齊
班特降宣旨令臣自今以後獨入引對不隨衆例者禮加
異等事越常倫褒稱發自於聖心崇盛獨光於道域隆恩
顯示負戴難勝臣某誠榮誠懼頓首頓首伏惟陛下誕膺
承天執符御曆包乾坤而覆載懸日月以照臨炫金鏡之
光華無幽不察調玉燭而亭育有物皆春由是露灑天根
澤流地表肅武功而定氛殺黜悛心修文德而服要荒
奸亮華面毳幕穹廬之俗冰居穴處之鄉重所來庭占風
入貢理定而樂作功成而禮行舉三代之類綱興百王之
墜典有沿有革無黨與偏至若群后朝元垂衣當宇儼三
傑十臣之佐冠非熊審像之賢文物羽儀輝今映古其或

雲衫羽服仰丹階而効嵩呼白足方袍列彤庭而申華祝
此時微臣常依旅進得面雲階每驚岩壑之微獲在烟霄
之上今則迴隆慶獎頓革前儀念臣雖迹預簪冠而身叨
爵秩清級總移於北省華資又接於南曹特令敷奏之時
不雜緇黃之侶俾其獨引顯示優恩昔者魏重謙之梁尊
貞白漢稱曼倩秦有子平禮容靡覩於新規朝揖首循于
常度今者降九天之明命垂萬世之宏規退省幽辱但切
凌兢之感頓慚纖弱何勝雨露之恩惟勵丹誠永酬鴻澤
臣某無任之至

謝獨引令宣付編入國史表

臣某言伏蒙聖慈特降宣旨賜臣不隨二教獨引對敬以

臣謝恩表宣付史館者迥自宸衷光申異禮仍編信史永
載優恩祇荷難任寵榮增極臣其中謝伏惟陛下大明御
曆至聖宣功廓覆載以覃恩並曦舒而流照賢良入輔庭
多命世之臣夷夏歸仁府積殊方之貢有俗皆臻於仁壽
無為欲蹈于華胥由是蓬島紫宮咸加炳燠祇林柰苑畢
集精嚴四震挺質以呈休六氣調時而表貺玄儒鼎盛緇
褐同欢臣猥以常倫榮逢景運道籍兩塵於美號官崇再
履於崇班別顯殊恩賜其獨對緇黃班裏受宣而徑上雲
天鵝鷺庭中顧影而疑生羽翼今則寵編國史昭示寰區
迥隆非次之恩永載不刊之典荒愚有素難勝雨露之深
蕭芥至微何報乾坤之德唯虔脩勵上答聖明臣不任

賀黃雲表

臣某伏觀鴻臚卿趙溫珪奏今月二十三日皇帝駕幸得
賢樓看閱將士皇太子自城南閱馬帳頭迴入城至酉時
城上有黃雲兩片狀如華蓋逡巡變為紫色者臣謹按堯
之誕生常有黃雲垂覆舜之御宇常有黃雲凝空又漢宣
帝幸甘泉宮紫雲入殿宋世祖踐祚紫雲見於端門黃帝
有瑞雲以雲紀官今者德動天休瑞呈雲物華夷共仰海
嶽同歡臣其中賀伏惟陛下體道握符惟天縱聖仁周動
植惠普寰瀛柔遠俗以文明懾亮奴以武畧蓋以中原未
泰品物未寧將申戡靜之机用拯生靈之弊投律則南摧
醜虺鑿門則北掃煙埃鐵軸牙檣水耀龍驤之旅霜戈雪

戟陸陳隼擊之師動振山川奔驅雷電佇聞恢拓以廓乾
坤爰命皇太子訓整六軍申明三令蒙輪扶輶之士壯氣
凌空拔山扛鼎之夫雄心貫日皆堅金石咸勵忠貞允合
天心果昭靈貺輪囷對起蕭索齊凝成金柯玉葉之奇高
浮帝座變紫蓋如葩之狀低接皇城初呈蔭昂之姿漸結
臨關之色有以見玄穹贊祐皇德升聞越唐堯虞舜之徵
超宋祖漢宣之感自此率賓八極文軌萬方增聖壽于億
千固宏基於隆永臣躬深睿獎疊覩殊祥敢諱味以抒情
誠効謳譎而頌聖德詩一首陳進

賀雅州進白鶴表

伏觀嚴道縣多功團崇善里百姓李彥韶於楠樹上獲白

鶴進獻者五行表瑞見金運之隆昌百辟同瞻賀玉京之
貽貺臣其中賀臣聞王者正名立訓體乎天意勝殘去殺
慰此人心則有異木珍禽來儀朝闕霜毛動色紺趾標奇
飲羽呈姿應見徒誇于漢魏傳聲送喜翱翔顯奉於皇明
伏惟陛下瑞冠百王功超三古協序而風調禹律燭昏而
鏡滿軒臺亭毒萬方再樹乾坤之本照臨下土重懸日月
之光鄙炎漢之息肩邁唐堯之鼓腹人謌歲稔物賴時康
況乃萬旅貔貅千營鎧甲擒亮剪孽撫弱字孤雷掀鉦鼓
之行雲黯旌旗之舉發令而雄豪踊躍申恩而疲瘵昭蘇
五星運度以垂休八海乘風而寢浪遂至山河効祉禽羽
呈祥遠離海上之巢來對雲中之闕觀其玉籠乍啓雪姿

不驚望聖苑以迴翔對天慈而鼓舞往來瑤陛棲泊珠簾
認素羽以難分聽新声而已熟不是成橋之侶殊非統樹
之群既彰團雪之容實煥來金之盛佇見干戈載止奸邪
屏除蕩疆場之烟烽永歸北極靜寰區之榛梗自我西方
信超魏德之雄更掩漢成之代臣獲逢昌運累親殊祥輒
陳歌頌之詞止流聖明之鑒臣謹課頌聖德紀瑞詩一首
陳進干瀆冕旒無任之至

賀天貞軍進嘉禾表

臣某伏觀天貞軍留後崔善進射洪縣百姓王友田上嘉
禾合穗圖者聖德遐通祥符疊至文武瞻觀中外欢呼臣
某謹按瑞圖云嘉禾者美瑞也稔歲精王者德至于土則

二苗同秀昔者唐叔得禾異畝同穎成王問周公曰二禾
一穗意天下和同乎王命唐叔作嘉禾篇由是九土會同
八紘歸化旅葵西貢越雒南來三十世之宏基七百年之
大業輝前映古踰夏掩商今在聖明復彰斯瑞伏惟陛下
紹軒皇之聖緒承周帝之洪源應曆教以配天摠華夷而
類帝惟恭惟儉絕嗜音醢酒之娛乃聖乃神有明目達聰
之美弘武德而先懲不軌電掃奸妖播文風而旋撫戎羗
雲奔蹕賚憂勤黎獻軫憫耕農歲致豐穰田無炎潦德通
于地見共秀於二苗應達乎天果異畝而同穎契聖祖興
周之瑞表吾君拓土之徵昔則和天地為一同今則包萬
方為一統况屬王師薄伐誓衆吊民雄稜已懾於彼方禎

異先呈於近境佇觀收剋永蕩氛霾開九天日月之光顯
符周卜合四海生靈之望同比唐禾臣竊仰瑞圖賡謨聖
感願預採詩之錄思陪唐叔之篇謹課頌聖德嘉禾合穗
詩一首進

請駕不巡幸軍前表

臣某伏觀宣旨駕北路軍前者臣聞展義巡功禮經垂典
誅兇伐叛有國通議蓋欲迴廣照於一方輯五瑞於群后
剪其暴亂慰彼蒸黎况蠢爾邠岐久迷大順匪朝伊夕即
親殄平不足以親駕戎車遠臨狡穴願衆懇食用驚疑
伏惟陛下逾舜文明超周神武稟秋霜之令敷春育之恩
委以至公雅其大信覆載之內風偃化行而隴渭之鄉岍

岐之俗甘寒谷之氣自棄陽和息惡木之陰顯孤臨照特
蟻封而稱固巢奠幙以偷安今則上將專征雄師薄伐遠
憑宸筭必剋根荑切惟漢曲褒川方當寒沍霜嶮棧豈易
躋登况射鮒穿蠅詎用千鈞之弩孤城荒堞寧銷萬束之
威伏乞聖慈俯狗群心特寢成命佇觀剋捷永統華夷干
冒宸嚴無任戰兢懼迫切屏營之至謹詣閣門表奉陳
謝以聞

第二上表

臣某伏觀宣旨駕北路軍前皇太子率臣百官等上表
陳請未賜俞允者省方風俗雖經典之舊儀慰換師徒乃
君父之慈照但以道途險阻水陸嚴凝遐邇群心實切憂

灼伏惟皇帝陛下體光慈惠逾舜欽明欲令寰海之人盡
沐雍熙之化憬茲沂隴密迩封隅久負歡盟深辜恩信識
變通者已束身効順建向背者猶掩耳偷安致一境之生
靈銜積年之怨抑狗吠堯而有日思慕舜以無由所以投
姜鉞以整師築韓壇而誓衆風馳號令兩驟雄豪上將奇
威振雷霆心堅鐵石指期尅日必就削平豈勞親駕翠輿
躬麾白羽六龍八馬驅馳嶮嶮之中萬騎千官迢遞層峰
之外方零霜雪漸逼返寒伏乞聖慈俯聆億兆之情特駐
省方之命上為宗社下慰華夷佇對捷書更開土宇臣叨
深慶獎倍慙明誠塵浼宸嚴不任待責望恩迫切禱祈之
至

謝恩賜興聖觀弘一大師張潛修造表

臣某伏奉恩勅宣賜左街興聖觀弘一大師張潛令脩葺
住持者寵自宸衷崇臻道域簪裳增抃芝朮騰輝臣其中
謝伏惟陛下道均軒后聖並放勛凝懷於始射之峯寄夢
於華胥之境矚言大教理契生津栖神泯合於無為屬念
潛期于有德化合清靜善利邦家觀宇蕭條像設塵翳爰
敷綸渥載俾葺崇伏以前件觀地接玉清昔為道學尋改
貞元之宇復標紫極之宮至德年中易名興聖前臨廣陌
東距錦江究是靈墟寔惟勝所况門庭具設像貌儼存誠
歷代之仙蹤乃皇都之福地今則重加繕飾盡撤暈腥拂
塵埃於湫陋之中還瞻玉相蕩鏡甃于蒿榛之內別築瑤

壇洒雨露而騫樹增榮薦沉麝而碎容伊穆張潛寺精專
剖劂恪勵住持夕磬晨鐘祝遐長于聖壽朝香暮燭期隆
永皇圖臣某獲列教門躬蒙睿澤不任之至

謝恩宣賜衙殿點鐘表

臣某伏蒙聖旨宣賜衙殿前點鐘一口於日院內充齋醮
扣擊者恩垂霄漢崇及簪裳拮跼無階輝華增極伏惟陛
下二曜覆燾三景照臨澤浸無涯惠敷有載故得八溟息
浪長鯨將殄於昌時五緯循常巨慧欲銷于永夕削平夷
夏倒戢干戈而復俯軫皇情留慈玄教致感應于洞府符
應見于震仙同當齊聖壽於日月星辰降寶祚于乾坤海
嶽今者念臣院宇之內冀篋未全每于齋醮之辰尚闕春

容之響既乏通真之畧莫諧集聖之儀輟瑤階泛日之音
來從天上須豐嶺會霜之韻降在人間事超錫樂之榮恩
重點鐘之賜永當炷焚芝木禱祝真靈冀啓禎休仰酬聖
獎所宣賜鐘臣謹以焚香祇受訖不任

謝恩賜玉局化老君表

臣某言伏奉恩勅宣賜舊玉局洞門石像老君歸龍興觀
御容院閣下西間奉安供養其蓋石舍一區移拆就觀起
立并賜錢設齋道衆將幡花引歸觀表讚寺者皇澤霽臨
玄門增耀康莊改觀道俗同歡臣其中謝伏惟陛下法道
披元垂衣運化暢清靜無為之理敷希夷不宰之功已洽
大寧將臻一統以玄元像貌密適宸居雖香燈無曠于常

儀而供養合歸于法宇爰申明命豐備齋羞焚蘭朮以飄
香森幢幡而成列鏡金鳴玉繞離象闕之庭雲邁風行遽
入龍興之閣群心瞻仰萬眾歡隨雷誼讚悅之音霧集聖
明之福臣與道衆竚獲栖大教盍荷隆恩永勵脩持上酬
睿獎不任之至

賀隴州表

臣某伏覩北而軍前隴州節度使桑簡以手下兵士及城
池歸降以復隴州者睿算遐宣元勳効節終申薄伐已復
雄城臣其中賀伏惟陛下聖邁黃軒威超周武運神机于
掌內動有成功料勅敵于教中舉無遺策自岐郊負義關
外隳盟深辜敦好之儀遽絕睦鄰之分擁豺狼之一旅恃

疆土于三州巢折葦以偷生安坐積薪而稱固小不事大
春秋所誅所以義士盱衡謀臣扼腕皆期殄掃遂奉戈矛
六軍奮躍以爭先八校喑鳴而致勇蹴土佇催于吳岳飲
馬將竭於渭流桑簡以智合變通心明向背倒戈銜璧効
命投誠獻千里之山河不施寸刃復一方之戶口無損秋
毫便迴毫社之鋒自收高受之眾想回中之路絕退且無
歸顧灞上之讐深竄將奚適料其元醜即見梟擒看通於
八水三山永統於九州四海俱頌舜曆盡入禹封臣獲奉
昌期累觀大捷無任之至

壽春節進章真人像表

臣某伏以皇圖昭永上帝開祥北極瑤樞煥虹光而誕睿

中天玉斗飛紫電以凝華萬國歡瞻群心增抃伏惟陛下
二儀炳靈九清集瑞至化塞乎天地清明肅於鬼神肇三
十世之宏基方隆周業興四百年之景運佇越漢罔浸德
澤於玄儒鼓薰風于夷夏今屬壽春大節祝聖昌辰琛賁
雲馳梯航波委咸脩芹禮以繼山呼臣與當院道士竒虔
拂華壇精依秋格諷琅書寶軸披霧韜霜羅克嚴蠲潔之
誠永廣乾坤之福鑒聖真人昔師道祖躬受靈篇傳真記
於先天緘瓊于福地豫明皇業洞達玄樞嵩公之識神堯
貞白之知梁武以之校美詎可同年是敢藻績繡繒式資
瞻仰庶同焚炷克嗣禎休干冒宸嚴臣無任祝聖虔切屏
營之至其畫像功德教竒謹詣閣門奉進以聞伏聽勅音

黃萬祐鄧百經賜紫衣師號謝恩表

臣某伏覩恩勅夔州道士黃萬祐賜紫衣仍師號羅江縣
道士鄧百經賜紫者大聖御天神功及物處有賢良之佐
野無遺逸之人率土朝宗允當聖日臣其中謝伏以黃萬
祐竒林泉得志麋鹿為群深處巖蘿罔窺名利或丹華救
物有迴生駐景之能朱篆誅邪有蕩魅除克之効皆張道
用潛贊明時遽捧鶴書來朝鳳闕萬祐既趨于錦水百經
至自于羅江共仰堯天俱榮舜澤歷觀前史莫得比倫伏
惟陛下道邁唐堯功高軒后想汾水凝神之日尚遠九重
比峒山請益之辰猶勞載駕今則蒲車允至桂檝云來徑
捨煙蘿躬朝旒宸顯封嘉號俱錫服章美輝簡編光揚簪

禍不任之至

廣成集卷之二

詔與黃萬祐相見謝表

唐杜光庭撰

臣某言伏奉宣旨令臣就內樞密院與和道大師黃萬祐相見者天慈軫念俯及孱微荷戴難勝兢崇增極臣其中謝伏惟陛下化知有道理尚至仁憂勞普及于萬方軫念無遺于一物故得眠雲逸士遙馳向闕之心傲世高人盡識朝天之禮弘道大師夙探至術深隱歎巖名姓可聞儀形莫覩今者爰隨徵詔直詣闕庭捨草帶荷裳褫紫衣師號事光史筆崇耀道門伏蒙聖慈宣命微臣與之相見獲奉睿明之獎得瞻雲鶴之容步武壺天躋昇蓬島祇膺異

渥榮耀萬生碩惟鷓鷯之微何振乾坤之德臣其不任
奏於龍興觀醮玉局劄子

右臣先蒙今年十月二十二日宣賜舊玉局洞門官舍一
所并石像老君一座移在當觀其舍今於殿後講堂基上
起立功畢便用安置石像老君焚備供養伏以名山大川
二十四化春秋常祀著在舊儀其玉局化所備常醮伏請
起天漢元年二月八日委本府縣祇就龍興觀玉局石像
老君前修設冀免曠闕以叶敬恭又北邙化在嵩州積年
已來醮祝皆闕况居率土之內宜申咸秩之文前件二化
今亦欲就龍興觀一處與玉局同用延祝景貺永福聖朝
謹舉如前伏聽勅旨

皇帝為太子生日設齋表

右臣伏奉聖旨為皇太子生辰宣賜莊宅庫錢陸拾貫文
省除於北帝院差選道衆二十一人於七月初八日開置
黃籙道場七晝夜至十五日散齋者伏以紫氣充庭青宮
誕睿動欢声於六合凝喜氣於九重凡在寰區皆虔祝賀
伏惟陛下恩周中外念軫臣寮以皇太子素切脩行常思
儉約懼與名之破費使衆力之煩勞應諸司欲有齋脩並
令止約頒賜內庫錢物特開仙觀壇場祈玉京金闕之真
廣宸殿離方之福美高典冊事邁古先臣某獲奉絲綸將
申焚祝觀維新之寵澤垂鴻上大之宏規不任抃蹈之至
謹錄狀陳賀謹奏

詣老君殿備黃籙齋表

臣某伏奉宣旨於北帝院奉太上老君脩黃籙道場三日
設齋散壇給內莊宅庫錢陸拾貫文省除差選道衆二十
一人行道禮懺須令精潔伏惟陛下功包五帝德懋三王
凝旒敷有道之風端宸暢無為之化宸心密感萬靈嚮應
以潛通睿想遐周四海雲隨而奉聖故得乾坤交泰日月
貞華歲阜年康風恒雨若神戈所指長蛇與封豕皆誅惠
渥所覃震魃與潛螭自屏由是仙山邃洞休瑞繼聞玉印
銅符禎祥間出今則拯橫流之難興時雨之師將廓八溟
同歸一統而猶翹心玄教讓德皇穹於中元齋潔之期備
三境香花之會上答玄元聖力特開黃籙寶壇用臻巨福

洪休克固瑤圖壽睿臣獲隆獎祇奏德音唯勵精誠以度
焚祝不任荷載之至

宣示解泰邊重謝恩表

臣某伏奉聖旨宣示東北向軍前所奏得鳳翔出歸官健
王彥劉等分拆賊中事宜并有謠言泰邊垂曲子待來年
者臣某言伏以天道玄微潛司兆朕神功幽晦寔主福祥
必憑謠詠之言以告休禎之旨昔吳時青童謠于廣陌尋
驗吳亡陳時異鳥下於高臺果彰陳滅五星飛落為虞舜
受國之期一馬化龍乃元帝興王之應斯皆發于天意感
契人心詳考嘉言允歸聖德伏惟陛下繼天誕睿應運啓
圖狗億兆之樂推撫臨海嶽承昊穹之瞻命拯救生靈曰

寶珍符不求自至夷踪塞責望日爭來而猶北境負恩孤
城背義坐積薪之上即致焚燒巢折葦之端立期齏粉果
見神明示識里巷傳謠竊聞所告之詞便生尅平之義所
言邊垂者乃國家散閑之外即是國之昔雨之師神道言
祥光陳僕后之詠成功克敵翹足可期即當蕩定三秦統
臨萬國瑤圖寶曆地久天長臣獲奉天慈躬聆吉語輒陳
淺見干浼宸嚴不任之至

謝宣賜天錫觀莊表

臣某伏蒙聖慈宣賜漢州通記縣天錫觀唐友則莊一所
永充常住者伏惟陛下繼天受命應運垂裳鴻圖豫定于
上清寶冊遽呈於厚地萬新觀宇允答休禎三殿之像貌

崇嚴終歲之香花精潔今則特頒睿澤廣錫莊田輟彼膏
腴永為常住望慈迴降玄教增崇自茲日給齋羞免有旁
求之闕晨香慕燭益專焚祝之心祈聖壽之延洪保宏基
之隆永臣某叨蒙聖獎躬荷殊恩不任之至

謝恩令僧行真修丈人觀表

臣某伏覩惠進大師僧行真狀奏奉聖旨修青城山丈人
真君殿功畢者伏惟陛下恩換萬方仁深二教祇園蓬島
咸均崇飾之慈鹿苑鼇宮俱被興修之賜爰於仙宇特命
高僧載申剝剝之功克就莊嚴之勝俄成邃殿永鎮福庭
期五山十洞之靈增彌劫齊天之壽臣獲居玄教躬荷皇
慈不任之至

宣為皇子修生日道場散齋表

臣某伏以九天集貺三景凝祥動樞殿以飛光降春宮而誕秀華夷增抃億兆同歡皇帝廣捨緡錢精崇齋福必冀上清照鑒隆萬壽於聖躬至道貽休介千祥于儲后克昌大寶永統九圍臣某等獲勵焚脩崇頒襯錫不任惶懼之至

謝元上尊號表

臣某伏奉恩制俞允宰臣等所上尊號者丹懇上陳皇明下矚自天有命率土同歡中謝伏惟皇帝陛下玄鳥誕商赤符興漢救焚拯溺神資命世之才日角月玄天啓乘時之瑞懋宏勲而崇睿德功蓋前朝摠曆教而廓洪基祇膺

寶運由是三靈改上萬國攸歸鄙成湯周武之君陳師用鉞笑創劉開隋之主侮寡凌孤振衣而康濟九圍凝旒而光臨天寶承耀魄中黃之祚執招拒西白之符握金鏡而照寰瀛人神交泰撫璿璣而覘海島億兆樂推故得御端門而嘉氣橫軒登圓丘而神兵扈伏謁清廟而玄雲四卷月瑩中宵膺鴻名而白氣輕飛煙籠廣砌麟呈沼沚龍躍江湍草樹含文雲霞絢綵金符踴篆玉璽流光雖讓德於上玄已盈編于太史又若天涯地表右塞南荒列奇貨於明庭貢神駒於天廡寶香來於絕域美玉薦於殊封漢孝武之四隅請頒正朔唐高宗之諸國願混車書將復禹封更開堯土百揆時叙六樂克和信及豚魚思加動植矜逋

已責恤獄省刑天無入牢之星地絕成牛之氣俘囚繫頸
咸蠲鈇鉞之威孽黨臨誅特有緡錢之錫牲牲肥膃菜盛
潔豐敢昭事於神明致仁賢乎綏冕達誠心於天地罄恭
恪於郊禋感無不通動叶喜應不銜奢靡不御織華無沉
湎之遊無恣憊之感不尚馳騁靡狗畋漁靜必肅嚴舉惟
典豐財和衆禁暴安人大閱以正武威大蒐以示軍實貌
貅百萬皆蒙輪拔拒之豪駭北干群盡驥子龍孫之駿延
獎忠孝博採器能片善無遺微功必錄專經雉子激之以
高科靖節出人縻之以好爵賞勤敦本務穡勸農歲多栖
畝之糧時豐廩實野有如雲之稼國富家肥四隅無烽燧
之勞百里有謠謠之樂星芒武將功高而武列沈、嶽秀

儒臣業瞻而儒風穆、雖仲謀之興江表玄德之有坤維
較美籌功曾何彷彿今則閔河克靜輯柝無誼鄰封之玉
帛交馳近境之干戈載戢人歡富壽政洽雍熙文武誠臣
願增徽懿中外漑懇華裔同辭果迴日月之光俯降允俞
之詔戴圓履矩率土普天觀盛禮而有期仰高穹而增忭
臣與道衆等不任踊躍歡呼激切之至
代人請歸姓表
臣聞磐石之宗義非他族維城之重實自本枝將垂久大
之規合定親疎之分臣自秉文律識昧武經獲履戎行早
塵天渥提戈擊劍惟願傾報主之心北伐南征每誓勤王
之鄙伏自皇帝陛下駕驅豪傑掃蕩寰瀛全其織芥之勞

假以殊常之澤賜為骨肉列在宗枋但勵捐軀冀酬睿造
今屬以乾坤改卜天地降休土德潛移金行啓運狗華夷
之推戴副億兆之歸依端居而神器自來遠同舜禘恭已
而龍圖肇創不假周征維山之寶祚天長淮水之瑤源地
久巍我帝緒須承綿瓞之宗浩蕩皇基難雜蓬門之子循
襟循已崇極增憂輒披昧死之誠甘寘逆鱗之罪期分貴
賤永叙仙凡伏乞聖慈許臣却還本姓干冒宸嚴無任待
罪望恩涕泗隕越之至

賀太陽合虧不虧表

臣某伏觀司天奏今月一日丁未巳時四刻太陽合虧於
軫宿十一度至未時四刻復圓今測驗不虧者日華騰景

君德齊尊超術曆而不虧彰睿明之通感中謝伏惟皇帝
陛下元陽誕聖二曜均明昇若木於震宮曜貞耀于乾道
體冬曦而流愛九有咸恩比春煦以延慈三無並照故得
大明增彩推笑難窺契覆載之殊休越陰陽之常度祥光
彌盛玄德動天逾漢日之再中邁堯輝之合璧書之青史
寔冠瑤圖臣獲奉昌期叨觀嘉貺退頌桑榆之景倍傾葵
藿之心不任歡躍之至

謝恩宣示修丈人觀殿功畢表

臣某言伏觀長平山惠進禪師行真奏伏惟宣旨重起立
丈人觀真君大殿功畢者聖造旁敷仙祠重創巨功克懋
靈跡增崇伏惟陛下德洽萬方惠分二教文風遐布殊庭

効柔服之誠武烈光宣異俗稟雪霜之令蓬宮柰苑咸遂
興修寰區瞻禮樂之容夷夏識玄緇之訓功侔大古美冠
前王去冬以丈人觀置立年深堂廡凋壞命高僧而制度
賜物力以興隆於是運石他山伐材幽谷梗柁入用剗剗
程能俄成大壯之功克致齊天之固虛簷瞰日廣砌橫空
雲拂危梁風生疎牖垣墉不改圖畫如新截岡阜而豁庭
除闢溝源而護階磴衝流莫及逆石難侵遥符睿聖之慈
顯此殊常之績集奇功於不朽增聖壽以無疆臣叨列玄
闕夙深望澤唯虔焚炷上答休明不任
宣醮丈人觀新殿安土地迴龍恩表
臣某伏奉宣旨以青城山丈人觀新殿功畢修醮安謝者

伏以陛下仁周海岳澤溥儒玄翹屬震山垂恩仙觀殿宇
之凋摧既久教門之興葺無由詔命真僧頒宣國力宏麗
有疑於化出巍峩遽比於神功鎮彼福承與天齊永臣獲
承睿獎虔啓醮壇嚴香燭以焚備通真靈而告謝霞峰雲
壑如聆萬歲之音玉曆金符更廣千椿之壽以今月二十
三日設醮訖却迴謹詣閣門奉表起居以聞
賀獲神劔進詩表
臣某言伏覩今日趙匡業所進合州江上得神劔一口宣
示中外者伏以特啓昇平祥符必降欲清兇孽神劔斯呈
助聖明斬斬之功表天地匡扶之力伏惟陛下功超三五
威肅寰瀛仁格幽明道均天地故得山川林谷吐金焰于

層崖風雨雷霆見霜鋒于萬里一條秋水初觀出地之姿
教尺練光究耀倚天之勢仍影彰變化顯著神奇普羸帝
得之於水心果吞六合今陛下獲之於江上即統萬方荆
鍾切玉者詎可比倫斬馬斷蛇者那堪儔擬臣榮逢昌運
獲覩殊祥輒貢詠歌願揚睿感謹課頌聖德七言四韻詩
一首陳進干流宸嚴無任之至

賀誅劉知俊表

臣某伏觀勅旨劉知俊以兇橫暴常已誅戮訖者罪惡貫
盈人神共憤允符聖斷克正嚴誅臣某誠抃誠快頓首伏
惟劉知俊性惟兇狡器本凡庸有貪狼苟且之心無報德
懷恩之志傾思危道迫歸我大朝顯敷雨露之慈旋受節

麾之寄委之非次待以不疑更除推轂之恩特付專征之
任而咆哮自恣殘忍為懷屠害黎元罔遵刑憲隳大國撫
柔之旨辜聖朝予代之仁既負鴻慈難逃顯戮伏惟陛下
思弘天地仁冠堯湯體至道以好生布春和而煦物夷蠻
戎狄皆知慈育之深日月星辰共鑒包荒之廣而知俊獨
違聖造肆用滯刑致遐限之未通阻四方之向化今則雷
霆震令斧鉞興誅使普天率土之人荷去惡除克之德克
昌祚曆永福生靈臣某獲覩宸嚴無任歡躍快抃之至

賀鶴鳴化枯樹再生表

臣某伏都邛州團練使張敬周奏大邑縣鶴鳴化玄一大
師郭昭美申當化有古栢樹內有七株枯已多年今再生

枝鬱茂異常州司隍人履驗有實者仙山表既嘉樹呈
祥符睿德之感通彰神功之茂育臣其誠歡誠拊頓首頓
首臣按圖瑞云帝王德及草木政致昇平則松栢常生木
有楨異伏惟陛下膺圖啓運握紀承天修文化而服遐荒
耀武威而平九有恩周草木惠及蝼蟻窮蕃解辯以歸仁
獷俗梯山而納賚由是涵濡異類感動殊倫雪兔霜禽栖
翔接影應龍神蔡表見為常今者玉洞雲峯靈墟古化當
炎漢理平之際乃天師修道之鄉林麓森竦烟霞煥艷蒼
崖薜織凌空之轍跡猶存翠墀莎封化鶴之壇基尚在而
巖前古栢枯朽多年霑雨露以重榮吐莖芽而再茂喬柯
裊翠密葉凝陰彼王虞之豫章難借繁盛雖瀨鄉之仙檜

莫繼禎祥惟七栢之興榮契卜年之遐永祥編瑞諫古昔
無倫臣獲奉昌期頌聆嘉瑞敢陳謠咏願播寰瀛謹課頌
聖德七言四韵詩一首陳進稱賀以聞

賀西域胡僧朝見表

臣某伏以西域天竺僧到闕朝覲者天慈遐被異域懷歸
致萬里之番僧朝千年之聖主華夷率化億兆同歡臣中
賀伏惟陛下繼聖統天体元立極惠周覆載仁匝寰區戎
蛮夷狄之鄉皆遵声教舜禹商周之德莫繼欽明由是睽
寶川馳梯航霧集貢無虛月史不絕書今者天竺遠戎葱
山曼俗在積雪流沙之外比峯岑鹿島之間遙望干霄之
雲遂起朝天之意言須重譯路想經年崎嶇不憚於窮荒

匍匐願瞻于聖日雖圖澄入夏祇辭于闐之東羅什依秦
亦自龜茲之北殺其迢迢亦驗嵩勤緬維臣子之心允自
聖明之感永編國史克廣聖功臣獲奉天光不任云云

壽春節進元始天尊幘并功德疏表

臣某伏以九曲澄瀾二儀交泰星渚表流虹之應斗樞開
飛電之祥瑞叶千年歡周萬國伏惟陛下握符受命端宸
承天弘至道而繼三皇敷上憲而超五帝化覃海嶽恩普
華夷辨髮鬢裘常修職貢四荒八極畢贊琛珍平六府而
天降殊祥洞三泉而地呈嘉貺莫不書彼玉篆波躍金鱗
獸顯霜姿禽飄雪翅芝英菌蠢膏露歲蕤靈仙時見于煙
巖貞檜重榮於雲谷瓊儲歲稔寶貨川臻無向隅不獲之

夫有比屋可封之俗故得遐方慕聖異域歸庭鼓舞翹誠
歡呼率化桑乾瀚海僧法靜則稽首朝天身毒罽賓三滿
多則傾心入貢皆瞻北極共祝南山今屬日麗九芒風和
八景壽春大節誕聖昌辰輒繪真容願崇睿福臣某無當
院道衆一起今月一日開置靈寶延壽道場七晝夜香燈
燭潔焚誦精虔冀憑妙道之功永祝無疆之壽前件畫像
及功德疏一通謹輒陳進干冒宸聰無任云云

謝恩賜陽平山呂延昌紫衣表

臣某伏奉勅恩賜陽平山主呂延昌紫衣仍補充內殿焚
修大德者恩垂霄漢榮及岩林草木增輝烟霞動彩凡栖
簪褐共感休明臣某中謝伏惟皇帝陛下惟睿開圖握符

御宇仁覃九土咸臻禎昱之私政布八荒已洽雍熙之化
由是群方述職重譯賓庭屬祝聖之昌辰標壽春之大節
布鴻私於二教灑皇澤於萬區呂延昌久處煙蘿深精藥
餌方專心於葺理敢企望於寵榮豈謂陛下念切勳臣獎
深學術以呂延昌醫方著効致考謹危疾蠲除迴降隆
恩顯頒命服霓裳象簡難勝天地之私暮燭朝香誓答聖
明之照臣某與道衆等不任云云

廣成集卷之三

宣進天竺僧二十韻詩表

唐杜光庭撰

臣某伏觀西天三滿多到闕朝對者伏以北通玉塞西渡
金河路出重關程逾萬里班定遠之經歷才及烏孫張博
望之訪尋祇過青海或蛇州魅磧人跡莫窮或飛雪流沙
馬蹄難至由是声教或異職貢少脩崑嶠白環首標瑞典
鍾山火玉顯謂祥珍况身毒居葱嶺之陰于闐隔雪峯之
外天竺遼曼跋涉辛勤慕中華億兆之尊嚮大蜀聖明之
主專申朝覲寔美簡編伏惟陛下縱聖體乾膺圖啓運德
逾義項仁冠堯湯脩文德而御要荒耀武功而安寰海故

得西夷率服萬寓知歸南通交趾之鄉北聚穹廬之俗獻
琛奉贄無曠歲時竊惟聽政之餘每降自天之澤興和玄
釋勸獎崇脩梵刹精嚴道宮煥麗一心齊致二教俱榮紫
霞洞之仙客効祥天竺國之胡僧入貢咸歸睿感共福皇
圖率土臣寮同深抃踊臣某芝田末學蓬岫孤蹤獲奉天
慈俯宣明命謹課頌聖德七言詩二十韵一首陳進昨自
三月已來偶蒙疾苦不獲隨例舞蹈堯階無任歡呼屏營
之至

謝手詔表

臣某言今日伏奉恩旨以臣今月十一日上表稱賀聖體
痊復事賜手詔獎飭者絳闕流恩紫泥頒寵仰承天造俯

慰凡庸臣某誠恭誠恐頓首頓首竊以臣將叨踈野幸列
班行雖焚修每祝於龍圖而旦夕合趨於鳳闕泊嬰疾苦
稍曠朝天昨日以皇帝陛下庶政懷勞萬机閑念偶致遠
裕尋就痊和是以臣稽首歡呼飛章稱賀寔簪裳之素分
乃周列之常儀豈謂皇慈曲頒紫詔臣謹已焚香跪受訖
無任瞻天荷聖激切屏營之至

謝宣賜道場錢表

臣某言今日伏奉聖旨以臣自前月二十一日就當院集
在觀道衆老宿等於三清壇上為皇帝陛下開置靈寶消
灾轉經禮念道場伏蒙宣賜錢二十貫文省除者伏以中
朝錫罷內庫頒財仰奉天慈倍銘凡懇臣某中謝伏以叨

為教主深受國恩凡日焚修皆歸職分豈期聖造仍降明
贊助之期廣天地遐長之壽臣某榮逢聖日仰觀神功不
任

賀聖體漸痊愈表

臣某言伏審昨日已來聖體頓就安愈臣某誠歡誠躍頓
首頓首伏惟皇帝陛下深仁御宇至道垂裳惠匝萬區恩
周品物晝乾夕惕焦勞而膝理愆和旰食宵衣憂軫而寒
暄爽候今則神明出贊川嶽効靈清廟貽祥玄穹降福克
安聖寢彌增西曜之輝廣納洪休益永萬年之壽華夷忭
悅億兆歡呼臣某日旬以來眼疾未減不獲趨馳玉闕蹈
舞天階瞻望煙霄不任

賀疾愈表

臣某言伏審聖體已就痊愈中外臣寮咸增踊躍臣某誠
歡誠抃頓首頓首臣聞五緯經緯尚有差其行度四時運
動猶或爽於慘舒雖寒暑之乖宜蓋陰陽之常數伏惟皇
帝陛下順時設教以德臨人萬机每繫於宸襟六氣稍違
于聖體今則神靈叶贊宗廟垂祥廣集天休頓安聖寢足
嗣唐堯之一統永延周帝之遐齡頒賞錫於醫功恩流海
內帑鼓呼於品物声震層霄巨寵私仰天上之寵顏已增
感聖捧禁中之鵝眼更切祝堯其所賜錢臣已依數跪受
俵給道衆訖臣與道衆等無任感恩激切屏營之至
賀嗣位表

臣某言伏審今日皇嗣寶位光御洪圖率土歡呼普天欣
載臣中賀臣聞成王嗣位舉千載之徽猷舜帝繼明為百
王之茂典上膺天命下契人情伏惟皇帝陛下道比成湯
仁同大禹德宜符於五緯運潛契于二儀是以克紹宗祧
光昇寶位昂祚彰維新之命洪基顯隆永之期即使車書
混同夷夏清泰九土有歸山之馬四溟無橫海之鯨克振
皇綱永安大業臣叨榮昌運獲列簪裳仰馳捧日之心雖
同竈扞俯抱卧漳之恨莫遂鳧趨臣無任瞻天望聖踊躍
屏營之至

賀德音表

臣某言今日皇帝御殿宣降德音者臣聞聖德法天應候

每行於亭育神功體道順時克布於生成莫不澤被九黎
惠敷萬國凡居覆載咸動歡呼臣其中賀伏惟皇帝陛下
宅據寰中日臨天下克儉而茅茨不剪栖神而金鏡高懸
是以冒黷宸嚴無任兢惧戰越之至

賀封資王忠王表

臣某伏覩降制封資王忠王者緣綸顯降典禮昭行宗社
貽休寰區增抃中賀伏惟皇帝陛下仁推立愛道慕篤新
增玉曆於延洪固瑤枝於遠大鳳書錫命麟趾增華浮喜
氣於絳霄集榮光于朱邸臣歡逢聖運仰觀威儀不任

賀新起天錫殿表

臣某伏觀恩勅大內新殿成賜名天錫殿者昂新正寢光

錫嘉名中外榮瞻華夷增忭臣中賀伏惟皇帝陛下承樞
啓運握斗垂衣包九土以君臨闕四門而敦睦法天構宇
隆帝宅于上京格地開基壯皇居於億世由是前羅象闕
遐敞龍庭總日月之貞華高嚴秀闥集星辰之瑞彩廣啓
文軒巍我壓參井之墟岌業應氏房之狀莫不嶽震飛礪
川后貢材人以子來功資神助雖鎬宮魯殿彼瓌細以難
儔漢闕周堂固尋常而莫並功云告畢寶額爰新顯神授
於上玄以符天錫耀宏圖於八極永播聖功臨海岳而閱
琛珍會諸侯而朝萬國將陳大禮以福群方叶神雁塞窮
荒雲奔玉帛雞林絕域霧集梯航運在無為俗欣有道今
則普宣德教克順正陽安地表之遺黎高開壽域御天錫

之新殿更扇薰風慰征役於藩方免逋懸於郡邑魅鄉遷
客俱從釋宥之恩罔罔縲囚盡舉寬明之典式曰三赦將
俟一同臣伏恨疾瘵所蒙不獲隨例舞蹈玉階無任歡呼
踊躍屏營之至

又賀德音表

臣某臣今日皇帝御殿宣降德音者雷雨作解渥澤滂流
而九土以無遺致群生之咸泰華夷億兆孰不歡呼臣某
中謝伏惟皇帝陛下嗣聖繼明握圖御宇蒸、大孝同漢
惠以承桃翼、小心比周王之纂極文懷遠俗武戢遐荒
膺乾而化洽無垠出震而仁周有截今則凝旒御宇正殿
宣恩安地表之黎元高躋壽域灑中天之德澤更扇薰風

憫征戍之勤勞釋賦租之逋滯投荒遷旅囹圄縲囚俱從
赦宥之私盡舉寬明之典騰歡聲於外域浮喜氣於雲間
車軌書文佇歸一統瑤圖玉曆克保千春臣獲以衰運躬
逢睿聖方嬰疾疹不獲舞蹈堯階瞻恋天慈無任歡呼踊
躍屏營之至

謝批答表

臣某臣伏奉恩勅以臣今月二日上賀登極表一道賜批
荅獎飭者寵降丹霄崇臨玄教綸垂五色出仙禁以昭彰
日煥九芒向芝田而照燭驚崇火次拊蹈無階臣中謝伏
惟皇帝陛下珠衡誕瑞玉斗縱神出震域以重光為乾樞
而纂聖德超啓誦弘孝德以垂衣明繼勛華宣大明而御

宇湛恩遐布惠渥旁敷歡呼振野以成雷喜氣凝空而作
蓋華夷億兆就日瞻雲臣某限以衰遲兼嬰疾恙仰龍墀
而潔懇陪歡舞而無日遂貢封章遙陳誠悃豈謂特降睿
獎俯降天章成行之瑞露葳蕤聯幅之鄉雲芬郁捧對而
嵩衡未重感恩而溟渤非深鸛鷄至微乾坤難報所賜批
答臣謹已焚香跪受訖無任荷聖戴恩之至

慰中祥大祥禫制表

臣某頓首頓首言日月不居大行皇帝奄及其祥伏惟皇
帝陛下攀號痛慕聖情難居上為宗桃下狗億兆俯全大
禮永福華夷臣衰疾所縈不獲隨例起居奉慰無任殞越
屏營之至謹奉表陳慰以聞

慰釋服表

臣某頓首頓首言日月不居大行皇帝崩背如昨奄經禮制伏惟皇帝陛下攀慕永遠聖情難居四海臣妾服制終禮瞻天靡及履地無容臣伏限衰疾所縈不獲趨詣闕庭哀慟臣無任感咽摧慕之至謹奉表陳慰以聞

慰冊廟號表

臣某言今月某日追冊大行皇帝尊謚及廟號者伏惟大行皇帝應天誕睿乘運開圖豐沛振衣功超于漢祖邠岐山枝董功邁于周文考唐堯翊善之名遵虞舜盛明之號今則式崇尊謚爰美聖功億兆咸哀寰區共感伏惟陛下悲纏罔極孝理萬方仰弓劍以難追奉冊書而增感溥天

率土哀殞同深

慰啓攢表

臣某言伏承大行皇帝今月某日啓攢宮者哀纏百辟號慟六宮伏惟陛下攀慕哀號聖情難處對弓劍而感增歎光景以冥懷臣伏恨衰疾所縈不獲隨例哀慟無任殞越屏營之至

慰拊廟禮畢表

臣某頓首頓首言伏奉某皇帝拊廟禮畢者禮重宗禋序中昭穆克遵嚴祀永耀神功云云伏惟陛下順考禮經欽明孝德正春禘秋嘗之典宗配天奉聖之儀允集鴻休永崇清廟普天率土哀慕同深

慰封陵表

臣某頓首頓首言伏觀大行皇帝陵寢封為某陵者臣竊
惟大行皇帝吞日叶祥履星應夢握乾元而啓曆拓坤野
以開基鄙吳魏之三分廣行恩化欲華夷之一統將混車
書陵寢正名允符聖德伏惟陛下纂承事重追美為先光
顯遺功輝華盛禮仰瞻懿躅稍慰聖情凡在臣寮同深哀
慕

慰發引表

臣某言伏惟大行皇帝靈駕以今月某日發引者二儀交
感兩曜無光億兆咸哀雲霞共慘臣某誠推誠叩頓首頓
首伏惟陛下孝思罔極聖情難居望仙駕以漸遙聽薤歌

而增咽追攀不急號慕難勝

賀登極後聽政表

臣某言伏審今月九日皇帝御明德殿聽政者文物羽儀
初陳於玉砌行鵷振鷺下列於瑤墀中外同歡寰瀛共賀
臣某誠懽誠躍頓首頓首伏惟皇帝陛下九天誕聖七政
縱神執玉斗而御乾龍將寧四海握璫衡而司大象爰收
萬方敷啓后之文明懋成王之道德今則雲開碧落齊瞻
北極之尊霞散滄溟共奉大明之照恩覃有截惠洽無垠
臣跡滯芝田榮逢寶運悲越吟而自感趨漢殿以無由瞻
望堯天不任抃蹈欢呼激切屏營之至

慰山陵畢表

臣某言伏承大行皇帝山陵禮畢者神宮長閉仙寢永安
率土生靈不任號慕云云伏惟皇帝陛下追慕不忘聖情
難居對馬鬣以增悲攀龍髯而求隔遊衣尚在仙駕已遙
追想英威推慕何及臣某伏恨衰疾不獲奉慰闕庭不任
號殞推咽之至謹奉表以聞

請不赴山陵表

臣某言竊承山陵俯逼皇帝陛下哀慕無窮欲躬赴陵寢
者恭聞中旨寔駭人情凡被照臨莫不惶惑臣某誠惶誠
恐頓首頓首伏以皇帝之孝也法天順人緣理制禮俾生
靈咸若而宗廟永安未聞以弓劍之哀誠履魯閔之獨行
遽勞警蹕親奉告脩伏惟皇帝陛下考百王之舊儀狗歷

世之成典特迴聖鑒俯契禮文遵前古之通規示後王之
令範彌彰孝理以慰萬方臣不任瀝懇虔望迫切之至謹
奉表陳乞以聞

廣成集卷之四

唐杜光庭撰

戶部張相公脩遷拔明真齋詞

臣聞太上開圖元皇演教三籙定金明之典功被人天九
 函懸玉匱之科惠周存沒竊尋經旨遵按玄文仰祈遷拔
 之恩輒脩懺陳之懇今月二十五日是臣先妣唐楚國夫
 人蜀追封宋國大夫人劉氏忌辰今月三十日是臣先考
 唐丞相太子太師致仕蜀追贈太尉忌辰謹賣油燭香花
 供養之具於成都府玉局化北帝院奉脩靈室明真道場
 一晝一夜道士一十四人三時行道三時轉經對乾象以
 披心馳香龍而上奏伏惟高尊憫鑒衆聖垂光普告四司

閔明三界降九龍符命開長夜寒庭鍊沐形魂遷拔神爽
出玄陰之府入洞陽之宮罪咎蠲消冤讐解釋落名地簡
列籍道階輪轉福鄉克登仙品九玄函識咸遂超昇誓勤
脩奉之心上答真靈之澤

張民國太夫人就宅脩黃籙齋詞

伏以妙道玄功濟時佐國真經秘旨拯物救人肇宏規於
億劫之前弘大化於萬天之內宗之者儲祥納祐修之者
駕景登辰披究古今昭彰典誥張氏克承禎貺運偶聖明
被沐天光輝華帝澤循懷願分常抱兢憂者已修躬每為
烟戒寔恐往世之積瑕未懺此生之累業將深函陰有註
訟之書冥漠有考延之籍又張氏今年天符臨於木墓之

位暗曜住於飛化之年火星炤于身宮仍當尅之性分大
運逢王金之上火力稍微小運值生金之鄉木氣已薄緇
思厄會倍用憂虞竊惟大道無方施恩普洽式申虔祝必
介休祥是用蠲潔丹心脩崇黃籙像瑤壇而肅列按瓊韻
以敷陳質信諸天燭蘭缸於午夜告明三界飄檀蕙于九
時露懇馳誠希恩悔遇伏惟高尊太上萬聖千真憫鑒叩
祈昭宣渥澤勅天司地府命陰職陽察異簿落名青宮著
籙和平債訟消解冤讎北都除執對之篇年齡漸遠南極
定延長之紀祿祚尤宜五行祛災滯之文九曜息照臨之
咎常歡舜日永蔭堯天眷屬樂康子孫忠孝九玄七祖生
逝先亡或拘滯昏衢未超福路願承道力便遂往生利祐

見存允蒙貞吉其有三塗六趣夜府寒鄉亦曰懺滌之緣
盡獲逍遙之果陰陽將吏宅宇龍神長悅豫以安寧俾凶
衰而殄息上願皇圖遐廣聖壽延洪卜年克大于姬周享
祚更隆于炎漢寰瀛一統書軌混同共傾捧日之心咸沐
自天之祐

奉化宗祐侍中黃籙齋詞

伏聞道本無為降元精而生二象而後教羅五緯而備
群形維地麗天無違於律曆陽舒陰慘咸繫於裁成由是
善惡循環吉凶倚伏乾剛坤載不能排九六之期瞻魄烏
輪不能革盈虧之勢况乎二儀稟質三命定生未超變化
之机固有推遷之理是宜兢懷省己審過知非常加策勵

之心冀動真靈之鑒臣夙承玄蔭早沐洪休運偶睿明身
叨寵任推忠陳力未申匡濟之勞翊聖扶天累荷超逾之
渥將壇相印委遇益隆蒼珮行師徽崇彌厚戒滿盈而徒
切報君父以何階尚恐動靜行藏有乖於素分屬心攀念
有忤於神明或在公有失於賞刑統眾有愆於裁斷或往
世之尤遠未解或積生之寃債未祛有一於斯皆宜懺滌
又今年二運俱逢於墓位飛天仍值於火星雖居華蓋祿
德之方恐有刑尅照臨之數以茲兢懼倍切懇誠徐氏年
運之中亦有災滯大小二運金火氣微飛宮遇於計都天
符臨於生月恐為災滯志在懺祈是敢恭備信儀虔申齋
潔按玄都品格脩黃籙道場嚴香花於二日六時召真聖

於諸天諸地凝神注念澀懇披心伏惟萬聖迴光衆真流
鑒憫其丹款錫以休祥赦已往之罪瑕息將來之厄滯明
星暗曜無臨昭之凶三命五行除衝妨之會寬仇和釋債
訟消平嗣胤繁昌壽祿延益九玄蒙福幽夜開光眷屬康
寧龍神安豫上願聖躬萬壽大業永昌播声教于九圍成
歡舜澤混車書於八極共樂克仁百穀豐盈六氣均暢誓
傾忠孝上酬英睿之慈克勵精誠仰副真靈之祐

上官子榮黃籙齋詞

伏以大道玄功至真妙感隨方流眈應念垂慈佐國濟人
恩周於動植祛災降福惠及於幽明凡所啓祈必蒙昭鑒
某氏以今年大小行運之內恐三命衰微陰陽宿曜之中

恐五星臨照致成災厄無所告祈竊聞黃籙妙齋功德廣
大無災不斛無厄不穰輒罄丹誠冀蒙玄祐謹依科法開
置壇場三日香燈九時懺謝至真冥應有感必通伏願三
境諸天高真衆聖降無涯之澤垂廣覆之恩為某氏解除
積世罪瑕多生寬債隨懺消平應時除蕩眷屬安貞公私
和泰誓傾忠孝永奉聖期

飛龍唐裔僕射受正一籙詞

伏聞冥寂之初混元之首道生一氣分彼兩儀陰陽有昇
降之殊清濁有仙凡之異是以紫清金闕高居太妙之庭
黃軸風闢下鎮窮泉之域隨機染惑曰生進退之疑委跡
沉浮遂有飄零之痛既非先覺必在指迷玄元皇帝當東

漢之季年啓南宮之寶笈首傳真籙大拯群生修之則駕
景冲虛行之則濟人佐國或蕩平氛沴成懲革克妖正日
月之天元風雲叶候靜災邪於地紀生植異愆歷代所尊
垂休靡極臣風承道蔭獲奉皇慈功輕而渥澤愈隆力薄
而君親未報常思稟窺秘籙宗受靈文勤旦夕之香燈勵
精虔而禱祝所冀家國同納福祥今則嚴備信儀恭開壇
埤通宵懺滌稽首歸依蘭燈夜燭於九真擅炷晨飛于三
境恭馳懇款冀達尊靈伏惟
太上三尊玄元大帝十方衆聖三洞威神鑒丹懇之誠賜
感通之應靈官真氣咸賜投傳使內保身安外祛災沴名
臻道籍罪滅陰曹九玄離積夜之鄉永栖長樂舉族享無

涯之善常奉休明算壽遐延公私清泰上願龍圖攸久鳳
曆延洪增聖壽於無疆乾坤共永布皇恩于有截海岳咸
安同為至道之風共暢無為之化

皇太子青城山脩齋詞

臣聞靈寶陳規齋戒感希夷之兆真文設教行歲通修鍊
之功莫不啓之於心弘之於道上可以虔祈穹昊昭達玄
微次可以宣布情誠祇延福祐永言清信敢薦虔恭伏以
皇帝劃地開基法天垂覆定禍亂而爰承土德闡真明而
克應金行翼、小心弘朽索薄冰之惧乾、夕惕有櫛風
沫雨之勞備歷歲時益勤祇敬是致年豐歲稔國富兵強
定蜀漢之疆圻扼黔巫之襟帶允允武威序彝倫至公

至平式崇治本四方慕義萬里歸仁梯航無隔于高深書
軌盡同于風教蓋九霄之靈癘信大道之冥扶是使帝圖
聿昌宸筭永言戴仰弥切兢持近者以星象留行稍淹時
景分野觀矚宣資禱祈是用潔志清心志機滌慮召十洲
之法侶約三洞之玄科敬設清齋仍修大醮伏願上真降
鑒衆聖宣慈迴機軸于玄閤啓輝光於丹道凡言災沴並
獲除消但有吉祥皆承應感增聖壽于千秣之外播皇猷
于萬宇之中壽山朶峻于五山福海更深于八海與乾坤
而齊固共日月而合明叶華戎推奉之情遂臣子依憑之
懇盡繫至教俯躬微衷冒瀆真仙無任兢惶戒惧激切屏
營之至謹遺得一大師賜紫張茂卿等一十四人虔修法

事願鑒冊誠

普康諸公主為皇帝修金籙齋詞

伏聞道混虛無泮玄黃為九玄之始象凝恍惚標化育為
獨化之源於是覆載以乾坤始臨以日月三才並道剛柔
之用迭興品彙攸生善惡之端遂列然後降之以君父佐
之以股肱法高皇不辜之慈體大帝無言之煦弘安疆域
大庇黎甿伏惟皇帝陛下出震臨人承乾御曆稟樞機之
精耀含嶽瀆之靈源明契三辰運符四序當天人之屬允
表識瑞之威臻曰念陵夷遂康丞庶鎮寧郡國割裂江山
辛勤倅大禹之功化洽媿成周之德豈忘宵旰莫憚焦勞
是用和平永期清泰其等今以時當端月節遇正陽屬二

氣之將交處年位之炎景思弘百福用薦千齡啓金籙之
靈壇造玉京之勝地伏願皇帝明齊月桂壽比天榆握金
鏡以御寰瀛致衢樽而歡億兆垂旒問道觀元愷之忠貞
負宸調元獲夔龍而翊贊四三皇而永同一六合以無虞
仰奉虛皇俯垂玄造冀納虔祈之志獲申懇禱之誠
皇太子為皇帝修金籙齋詞
伏以浩邈無涯育乾坤者至道彌綸莫極運造化者玄功
凝一氣以生三才周六虛而吹萬有所以春皇秋帝雲紀
火官承妙用以御寰瀛骸無為而統天地曷常不啗和韞
粹端拱穆清執大象以臨人乘飛龍而布化雖流金燦石
湯德彌光懷山襄陵堯風益扇皇帝應圖負宸握鏡開基

慕玄元慈儉之宗仰黃帝華胥之躅日慎一日雖休勿休
故得聲教旁敷京坻積稔俗臻暇豫民樂雍熙交歡自治
於鄰封縣贖爭來于絕域倍增寅畏祇荷穹旻昨以垂象
飛芒天文炯戒躔度雖殊于分野禱祈勵切于焚修恭啓
皇壇敢希鴻福仰玉清之玄化稽首知歸開金籙之道場
齋心黻願所貴者達誠碧落薦壽皇躬與日與月之同明
共地共天之咸久青詞奏御俾金慧以韜光丹表通真致
珠囊之叶度災躔永息禎瑞常臻鳳曆克調狼烟不警政
隆三五祚越億千位忝儲宮寶欽仙境輒傾素懇仰望玄
慈
中元衆脩金籙齋詞

伏聞至道希夷真精玄寂弘化於混元之表凝光於太極
之先散淳一之根潛分步驟鼓生三之氣以制寰瀛所以
乘龍製氣之君畫卦垂衣之后順敷道要創厥皇基恢妙
用而福寰中布神功而利天下昭彰帝紀炳蔚人文允屬
睿朝誕應天矐皇帝儀軋受命應運開圖繼軒黃帝項之
靈源茂稟父周公之至德纂承土運光啓金衡端旒宸以
穆清慕唐虞而真正思洽大同之理以康九土之民稼穡
連豐華戎咸泰皇儲輝重明之美遐方贊有道之風中外
恬夷生靈輯睦况屬三元令序大宥昌辰宜虔齋潔之誠
共祝君親之壽拂瑤壇而展禮按金籙以陳儀龍綵質心
香花備信燭九光之蓮炬下照冥津飄三素之檀煙上開

真域必冀三天降祐萬聖延慈宗社隆昌寶圖安鎮齊軋
坤於聖壽等日月於睿明文德武功綏寧八極天枝寶胤
輝映萬齡儲皇享椿桂之年常扶大業妃后潔蘋蘩之德
共翼宸居朱邸清廟彌臻景貺外藩內輔益履殊榮常樂
雍熙皆登富壽其有宿殃積募往債前寃年辰命運之災
算紀飛旗之厄乘茲懺謝並乞消平即冀宗廟尊靈生神
三境臣等九玄七祖受福諸天貽祚流祥傳休與極上願
天文昭著象緯澄清回直符太乙之旗息玉葦金芒之曜
蕩憂惠予井參之野延福祥於梁益之墟九穀無虞五兵
斯戢螟蝗水旱無肆沴於農功疫癘凶荒靡非災于閭里
幽閑舒泰品類滋榮海岳歸仁寰區稟化至有立功將士

往逝都頭勳著勤王忠推効命每日齋薦皆為懺祈必離
冥漠之鄉更遂逍遙之樂或出陰尚滯渙澤未霑或嗣續
已無冀羞多闕九宮符命即為遷神二籙洪恩俱令濟苦
勿為疢癘速詣福廷動植飛沈盡登真道

皇帝修符瑞報恩齋詞

蓋聞歷代帝王受天符命咸宗至道以御鴻圖莫不用慈
寶以臨人仗玄功而濟物克致雍熙之運仍頒祥瑞之文
顧以薄躬猥臨大寶寰區尚擾思僊武而未臻法令頒行
念措刑而莫得內惟兢業莫敢違寧今年七月漢州十郡
縣百姓郭迴芝于仙居覩採藥耕地掘得銅牌長七寸廣
四寸上有六十字老子通天記云丁卯年甲戌乙亥人王

生享二百年天子王苴建王元膺王萬感王嶽王則王道
宜五字篆文後云北邙化張弘道天寶留此明聖代欽承
玄規虔佩靈符識大道之垂休知百年之惟永爰傾丹懇
用荅殊休按九苛之科儀脩靈寶之法事所願丹心徑達
聖鑒俯臨社稷永昌休徵必應四時合序萬物以嘉俾令
率土之賓保盡無疆之福稽首謹詞

黃齋助中元黃籙齋詞二首助燃燈詞

伏聞三元大宥乃諸天降福之辰九夜長幽是厚地重陰
之境將消積暗爰假神燈上納三光下炤群衆經科所重
濟獲攸先令屬序屆中元壇開黃籙三時朝懺萬罪蠲消
輒脩香油同申供養伏冀鸞輝鳳焰凝光地府之中星布

蓮敷散景泉禰之內盡超苦趣亦出冥津九祖生天六親
介福災祛未兆善洽與疆奉上安家並希元吉

黃齊為二亡男助黃籙齋詞

臣聞包容萬象大道為亭育之尊弘濟群生天尊演虛無
之教莫不思覃緇芥澤普存亡明真開玉墮之書長夜釋
重陰之苦丹誠上感玄貺必臻臣遇咎夙彰神明垂譴終
逾一月繼喪二男憔悴中年寂寥孤影痛蒸嘗之時絕念
冥漠以何依懼彼營魂尚為拘滯伏思遷拔唯仗焚脩捨
其服用之資助此香燈之會涼飈韻磬應聞泉曲之中秋
月凝壇想照夜臺之下願承齋福俱出幽闕鍊魄朱宮生
神絳府各遂逍遙之路盡登清淨之鄉永奉正真長居道

域人間天上終際會於善緣萬劫千生更團圓於眷屬昭

願力真聖鑒知不任涕咽虔祈之至

趙部助上元黃籙齋詞三首

至道流慈元皇垂貺三宮四赦爰予作解之恩品物昭崇
共樂如春之澤皇壇巨祐幽顯無遺臣以庸愚叨逢聖運
早承寵祿常戒滿盈猶恐年曆之間星辰之內曰纏厄會
尤切兢憂輒日黃籙道場虔申悔謝仰希上聖俯鑒冲襟
密賜福祥潛祛災咎壽年增益家眷康宜存歿幽明同臻

景祐

中元

律移朱夏節應素秋鼓夷則於西郊飲火雲于南極裁非

戒惡允屬茲辰猥以塵土叨親道化身參冊錄名隸玄臺
而過尤易結世網難祛動靜行藏未混融於大道年辰宿
曜猶纏集於眾災輒曰黃籙寶壇助營香供冀蒙聖力俯
鑒愚衷開罪書而解赦愆尤豁塵累而蕩濁厄難九玄受
賜舉族霑榮永承祐護之恩誓竭歸依之願

下元

臣以宿日獲承積祐早參職務族泰官榮而所主重難常
深憂懼尚慮行年災滯皇曜加臨遂履困蒙莫知祈告今
屬玄冥屆節水帝司辰星杓方指於孟冬朔氣正雄於北
陸年光遷貿修奉彌崇敢曰九奏之壇虔瞻上聖盡瀝萬
重之懇願降殊慈賜臣罪咎消平災凶殄息前寬夙債乘

功德以和寧往世今生荷懺祈而濟拔九玄享福舉世霑
榮克承憫祐之功永勵歸依之懇

馮洎大夫助上元齋詞

伏以大道重文澤周存歿天尊演化恩及幽明廣敷九等
之科以拯重冥之苦敢持哀懇仰叩玄關今月二十六日
仁妣隴西郡君贈隴西郡太夫人李氏忌齋詣玉局靈壇
曰上元勝會同修香供用禱福祥伏願亡妣鍊景朱陵栖
神玄圃悟恬澹希夷之道契長生永劫之真玄會無為克
臻妙果

中元

伏聞黃籙明科紫陽具典玄元勝力丹簡宣恩拯拔幽沉

照臨冥夜古今宗稟生死啣恩有感必通所祈克應今月	二十六日是臣先妣贈隴西郡太夫人忌辰輒曰玉局壇	場中元齋薦同申修奉冀達真靈伏願亡妣乘此福緣高	昇道境遊神碧落蜕影丹臺永登快樂之鄉克證希夷之	道	下元	伏以黑帝御時玄冥肇序下元勝會大宥昌辰所宜虔祝	上真勵精下土 ^用 祈禎祝以福存亡今以玉局靈墟瑤壇展	禮輒持法信用助齋誠敢希衆聖鑒臨萬真昭祐九玄開	度超離冥漠之鄉五族叶和長荷安貞之福災凶殄息罪	咎消平永誓丹襟仰承洪澤
------------------------	------------------------	------------------------	------------------------	---	----	------------------------	--------------------------------------	------------------------	------------------------	-------------

周庠員外助上元齋詞

伏聞齋敷九考節啓三元是萬方禱福之辰是衆聖宣恩	之日今屬玄元真化玉局靈壇陳黃籙之儀按玄都之品	九時奏御三日焚修精助香燈同申懺滌伏冀高尊重祐	大道流慈採納精誠降頒鴻福九祖遂超昇之願六親霑	覆護之仁消厄滯於將來解寃讎於既往罪咎原釋疾苦	痊平壽祿增延凶災除蕩克叶發生之德敢忘大道之恩	下元	伏以玄帝司辰水官統序乃請福延恩之節是凝心滌慮	之期况玉局仙蹤瑤壇盛禮九時焚祝必介于休禎三日	齋莊敢同於懺謝所冀災纏殄息寃債消平罪咎咸蠲存
------------------------	------------------------	------------------------	------------------------	------------------------	------------------------	----	------------------------	------------------------	------------------------

亡共泰永慶修奉以答玄慈

盧蔚大夫助上元齋詞

伏以大道周行三元立訓陟明考校毫末無遺臣早慕玄

虛夙宗清淨每展恪勤之懇以祈昭祐之慈今以玉局靈

壇上元福會輒賫香燭同助焚修所祈消解灾凶滌除罪

咎蠲平疾厄延益年齡善功克被於存亡禎貺旁周於眷

屬永勤丹慊仰副玄慈

上元

伏以考校良辰先春令序當上元陟明之日乃群生舒泰

之期式罄齋誠以申虔祝今屬錦都靈化玉局瑤壇啓黃

籙之真儀展玄科之盛禮輒持香信同助良曰伏惟眾聖

垂慈萬真昭鑒憫其修奉錫以禎祥惠普存亡遐祛罪咎

解災纏于未兆增祿壽於維新永勵丹心上副玄貺

中元

伏以四始周行三元定籙陟明顯晦考校無遺臣素奉道

科早師玄寂每逢良會必勵修崇今以玉局朝元霜壇歲

事輒賫香燭潔助齋功所祈大宥之恩允降自天之澤疾

恙痊愈祿筭增延仰薦先靈旁沾眷屬永承丕祐欽贊元

勛不任歸命丹切之至

下元

伏以水德配時玄冬叶候當二氣謹藏之節是諸天校會

之期所宜勵志重玄凝心至道滌瑕悔過清福希息况玉

局皇壇錦城福會敢營香幣曰助齋修三日肅虔九時朝
懺冀蒙昭祐廣賜休祥賜臣玄祖超昇陰冥開泰存亡濟
度災咎消平釋寃債于夜庭落罪尤于地簡疾厄痊復筭
紀遐長誓頌嚴奉之誠常副真靈之祐

廣成集卷之五

上元玉局化衆修黃籙齋詞

唐杜光庭撰

伏聞道出虛無之表職在生成德超仁義之先功包慈育
化綿億劫教普群方由是三皇以道御乾坤五帝以德承
天地人臻福壽俗致雍熈雖金木運遷步驟時革理家康
國惟道為先行之則四海晏清代遷淳樸遠之則中原版
蕩物變澆漓我國家師大古之風紹玄元之訓懷道抱德
祖舜述堯故能縱神武以滌埃氛中興鳳曆光聖文而安
社稷克固鴻圖臣等夙荷道慈獲逢昭運微功未著寵澤
已深思虔齋潔之誠仰報君親之德今屬天官統序木帝

司方當上元校戒之期是下土精誠之節共責法信同請
靈壇脩玉籙金豆之儀陳十極四華之禮蓮缸散焰續陽
景以燭幽閔蘭炷飄煙御星躔而達卑懇必冀衆真迂駕
萬聖迴軒俯鑒羣心洪流巨福上扶宸極安常業以天長
仰奉廟謀鎮坤維而地久邊烽不警氣序式和穀稼滋豐
生靈舒泰寰瀛輯睦車軌混同妖沴不興禎祥荐委臣等
存亡未介福七祖生天族屬沾榮三災弭息或前生今世
罪網未祛或往債宿冤過尤未解或刑章有失或宰割不
明或故殺誤傷曰成報對或運心履行有犯神明或土木
奢華服用繁侈三官紀過五帝司非憑此懺祈皆希蕩洗
賜臣等壽齡延永祿祚遐長災厄蠲消冤讐和釋其有同

心事主戮力勤王風露先驚古今俄隔緬惟夜府願享福
緣爰伸濟拔之同俱遂超昇之路其次蒸嘗曠絕冥漠與
依亦俾往生勿為淪滯龍神正秩五廟靈司秉黃籙之殊
恩沐玄都之景貺肅清風景安鎮方隅疫毒無侵干戈不
作蛸翹異品動植殊形六趣四生三途五苦九龍符命三
寶威光普沐神功並登真道
白可球明真齋讚老君詞
伏聞道本至無化分妙有^功包覆燾恩普出明家國稟之以
安寧存亡得之以開濟神威靈澤妙用無窮臣以玉局洞
天神仙輿府將申瞻敬式表宸儀遂為玄祖出高塑造真
像眸容端穆侍衛駢羅疑珠宮下降之初若玉座浮空之

際巨功既畢妙相益嚴日角月玄煥矣群生之主綠眉皓
髮魏乎萬聖之尊永福一方以鎮靈化是用虔修表讚載
展誠祈披玉匱之科脩明真之典轉經行道燃燈炷香瀝
懇上玄冥心下土伏冀傾光三境迴駕九清憫鑒塵微降
流禎貺潛扶寶柞密祐聖朝聿自然清淨之風臻太古無
為之理次願坤維南穆川境晏安符瑞有聞災沴不作臣
九玄幽典七祖魂神出長夜之庭昇洞陽之館毀絕地籙
起翦天衢洎乎有識含生三途六趣俱沾景福各遂生成
臣積罪銷平宿瑕除蕩災纏霧廓道化風行得周象之玄
珠入希夷之秘籙誓精修奉以荅玄恩

溫江縣招賢觀衆齋詞

伏聞妙道融真高出混元之表天尊立教光敷浩劫之先
歷代化人隨機濟物大惟邦國普及幽明俱賴神功咸承
景貺臣等叨逢聖運夙稟真詮欽玄元道遠之宗觀烈祖
神仙之躅尚拘世網未脫樊籠分地角用天恭守玄儒之
訓節財約已敢忘覆載之私今屬至聖垂衣元勳撫俗五
兵罷釐百穀荐登野洽謳譎人歸富壽當九井降生之月
是三台誕瑞之期將報洪恩莫先黃籙是敢博求衆力同
備信儀嚴飾仙蹤遵依秘格披心十極歸命諸天燃燈炷
香馳誠達懇伏冀三尊駐景下察卹襟萬聖迴軒傍流玄
澤上扶社稷配天地以安禎仰贊聖躬同日月而輝煥台
星福曜常鎮坤維將畧廟謀永宣井邑一方昭泰四境久

安疫毒無侵戈鋌不作臣等九玄七祖超度泉扃五族六
親允蒙禎祐銷平罪咎和釋災凶農蚕克保於豐穰幽苦
咸期於扶濟龍神鎮守風雨均調道化周行靈威廣被茫
茫九土擾々四生承黃壇普懺之緣曰太上九龍之命俱
昇道果普陟仙階飄浮絕祭之魂霜露沾零之魄勿為疵
癘各遂徃生道力所覃永叶元吉

犀浦劉殷費順黃籙齋詞

伏以清淨之宗託重玄而設教生成之本資妙用以宣功
家國稟之而允昌古今運之而不竭粵惟道化首出帝先
今屬睿聖御天元台分閭敷知道德字育蒸黎法伊堯湯
舜之仁邁后稷臯陶之德萬方有泰四境無虞共感殊恩

何階上答是用率勅寮屬考按經科嚴飾壇場備申齋潔

精香燈而達懇奉信幣以表誠注念九清馳心三境伏冀

玄光下燭至聖冥通俯鑒群情滂流巨澤上扶帝業光讚

聖比三辰以並明媿西儀而等固觀池鳳穴之野声教

遐傳桑津滂谷之鄉車書混一保寧藩部匡祐元戎天祿

永增壽涯弥廣臣九冥玄祖超苦趣于函閔五族周親享

善緣于道域封隅之內三農有積於倉廩政化之中群瑞

日編于簡冊干戈靜息疵癘無侵其有滯骨飄魂久悲風

露傷墳敗廟常苦凋荒乘此勝日咸臻妙樂龍神安士

庶昭魁蠢動有生同昇福界

飛龍使唐裔為皇太子降誕修齋詞

臣聞惟道為大運玄功而生育乾坤惟帝為尊握洪樞而
主張造化廣司萬國遐統群生承景命於三清定宏基于
九土由是瑤圖積瑞銀漢騰華載誕元良恢弘大業今屬
祥虹泛綠寶電飛光當重離啓耀之期是率土虔誠之節
敢披雲笈恭詣仙壇備靈寶之道場儼長生之勝會鯨鐘
鳳磬飄逸響于九天鶴燭龍相達精誠于三境伏冀皇圖
隆永均雨露以無窮聖壽高崇與八溟而比大六宮內職
協讚宸居萬彙群方昭宣睿德皇太子龍文鳳質岳固松
貞超漢盈周賢扶一統大同均化旁及黔黎共宗有道之
期並洽無為之運臣某不任禱祝虔祈歸命之至
興州王承休特進為母修黃籙齋詞

臣聞上聖垂科天真設教神功救物無遺動植之中惠力
宣恩普及昇沉之內粵自玄古逮于茲辰荷澤蒙慈莫知
紀極由是鄴山北部潛祛邪沴之塵斗極南昌廣布生成
之煦必資虔潔方獲感通臣猥以凡微叨榮道廕遭逢睿
獎踐歷官業入侍天階高陟九霄之上出持符竹寵臨千
里之中或齊肅師徒頒行刑憲輯寧封部須舉威章慮乖
折衷之宜自擬過尤之目以茲兢灼常寘肺懷今則臣母
竇氏本命甲子某月日生災運所纏嬰疾苦錐動服餌未
獲痊平恐是往債宿寃尚為注訟前生今世縱結罪名或
星曜所臨或年辰所歷凶災凌撓命祿衰微曉夕憂惶周
知救護况臣主持王事迢遞道途不得躬奉庭闈親調藥

膳心馳萬壑目斷千山惟憑大道之慈冀集感通之効是
用歸依靈觀稽首華壇修黃籙道場告玄真上聖願迴聖
鑒俯介福祥賜臣母氏易短促之齡益遐長之祚蠲消厄
會蕩滌災衰使六氣均調百閔康愈咎瑕除解寃債和平
克瞻日月之華別降生成之福三途幽夜六趣殊倫同享
勝日共臻善祝九玄開度五族安寧微臣常奉二親得勵
甘旨之願榮朝聖主永勤忠赤之誠惟誓丹襟上副玄祐
不任瀝懇望恩虔祈之至謹詞

胡常侍修黃籙齋詞

臣聞妙本希微至真虛寂運神功而化育陶品物以生成
應感無私周流靡倦所以九品三古咸宣燾載之慈天上

人間共沐涵濡之澤金科玉曆雲篆瑤章先萬法以垂文
具九流而拯世大哉至教無得而稱臣夙荷道恩欣逢景
運優游玄造沐浴皇風逸豫順於天和俯仰榮於大化早
叅秘籙常勵明誠燧燭焚香每肅虔於曉夕瓊儀寶籙敢
有怠於敬恭族屬周親常臻廕護是用精修黃籙上奉玄
休按十華三境之儀脩羽磬霜鍾之禮歸心萬聖稽首諸
天伏惟俯鑒丹襟曲垂玄造憫茲誠款錫以休祥賜臣九
祖七臣生天證道六親五族受福沾榮存亡均康濟之仁
動靜獲安貞之賜災凶殄息寃債和平罪咎蠲銷祿算延
益普天含識率土懷生俱承道德之緣永樂雍熙之化不
任歸命虔祈之至謹詞

李玄微為亡女修齋詞

臣粵自塵微早依真教叨深玄渥夙荷靈休迥以俗机縈
纏世網久拘職宦罔遂初心思羽褐以未期欲奮飛而徒
切依棲修敬敢忘私誠而過咎所鍾女子殞逝光陰邁往
傷痛難勝但女子初笄之年歸于儀氏夫歿之後誓志道
門已造製法衣繕寫經籙永期頂冠佩服虔奉修持值臣
以王事征行未果前願俄嬰疾恙奄此淪忘抱幽懇而莫
伸念冥闕而增恨伏惟三尊慈憫衆聖哀憐曲迴鑒祐之
恩特降遷昇之澤俾其魂魄得輅歸依積生之寃債銷平
在世之罪瑕蠲釋拔度幽泉之苦獲居善典之中道力玄
功常加祐護其亡女所修馮法籙道衣等謹于道場前焚

燒上奏伏惟至聖鑒照愚衷勅其魂神開度領受臣不任

瀝懇虔祈哀痛迫切之至謹詞

天冊巡官何文濟為東院生

臣聞天地分靈君臣定位必資輔贊用致昇平猶風虎以
相須若雲龍而感輟由是吹塵入夢諭鼎膺求審象生賢
熊氏卜臯夔之旦堯曆元凱虞朝齊軒后之風莫不輝灼
帝圖光昭史筆以康億兆以福寰區今屬歲紀壬辰日乘
庚午朔居天候月合水衡凝南斗之禎休集東陵之瑞彩
景風入律星火開祥誕昇降嵩允當令序叨脩青襟之列
輒祈玄聖之恩虔詣華壇願崇鴻福蘭缸夜燭檀穗朝飛
仰陳三奏之儀必達九天之鑒伏冀青函紫筆延生題東

極之書絳簡朱編得道署南昌之籍壽同山峻祿並海深
樂境增澄萊衣顯德鴈序繼三台之美鯉庭超七葉之雄
陶治九圍匡扶元聖政歸一統俗洽大同普覃夷夏之方
永鎮雍熙之化臣某受恩隆異省已虛辱唯叩靈真曾明
感激不任瀝懇虔心歸命之至謹詞

宣勝軍使王謙為亡男昭胤明真齋詞

伏聞大化無方神功廣被洞幽明而赴感普生死以垂恩
極度無遺古今蒙澤臣頃者專征北陸統領師徒橫黑稍
以臨戎誓傾臣節奮琯戈而効命志洗國儲山川有登涉
之遙糧饋有輓輸之重惟期辦集正切憂兢又一軍之人
苦於瘧疫死傷枕藉相望道途兼小累昭胤疾恙所嬰性

命懸迫茲丹誠而啓願冀玄聖之鑒臨尋遂迴戈免貽曠
闕再朝丹陛祇本皇慈恭荷道恩敢申昭謝是用按洞玄
品格披靈寶典儀考九幽長夜之科遵玉匱明真之式精
修齋直上蒼靈慈伏冀三界照臨諸天憫護賜九玄七祖
超苦趣于幽閔眷屬親緣享福祥於昭代臣積生累咎往
世寬讐及主務已來公私負犯或賞刑不當或裁斲失宜
俗有怨嗟遇書陰隲致使動貽障塞莫值亨通晝夜循懷
常增憂惕曰今齋謝並乞懺除亡男昭胤未及壯年飄魂
異境憫其淪謝悲痛尤深或有邪沴侵傷或是幽靈拘制
虔祈道力俾遂生神度南丹流火之庭昇上境羽陽之府
參玄證品悟道登真罪咎蠲除寬債和釋臣等災纏超解

厄運清消祿秩壽涯更期延益惟勤誠節永酬聖主之恩
克勵焚修仰副真靈之祐

王承鄜為亡考修明真齋詞

伏聞至道開圖三尊重教惠覃幽顯澤洽死生遊觀八門
播弘慈而濟苦憫傷幽夜迴法炬以流光南宮闢鍊化之
度丹簡啓超昇之籍上智童子願開罪福之由飛天神人
請示懺陳之品敷明真典拔度幽閔披王匱金科解消
考對玄清昏翳灑潤焦勞拯援窮魂咸為善爽終天載劫
俱沐玄慈臣先考運偶道風常參寶錄身逢聖日累踐官
崇處世網之中寧無過悞履塵寰之內必有愆違况職主
庖蓋須行宰戮旋司戎伍每舉刑章出領郡符入居近密

或抑強扶弱或三令五申既與重輕即為霧咎又自鄉閭

隔越兵火亂離故里墳塋或有侵毀塚訟延注逮及子孫

兼割貨所居移易門巷土木修造有觸明神以此憂惶皆

祈懺謝是敢遵靈寶科格修明真道場精潔香燭豐嚴信

幣披心露懇悔遇希息伏惟

太上三尊十方眾聖神光下燭惠渥滂流赦先考累世以

來深殃積罪削名地簡濯質天衢故傷誤殺之愆徃債前

寬之日後嗣攷延之咎先人怨責之瑕並賜原除內外清

淨即乞鍊神丹霍列藉青華不經於岱岳鄴山克證於福

堂天路上願九玄開度七祖超昇墳墓安寧幽冥潛靜三

途六趣共洽勝功內族外親俱臻景祐創心投血拜手祈

天不任號歿激切涕咽之至謹詞

皇太子宴諸將祈晴感應靈寶齋詞

蓋聞至道應機有同響答明神赴感無異景隨緬維幽贊
之私每荷垂休之力六月二十二日皇太子之會諸將已
上下吉辰方當暑雨之時遂有晴明之禱果蒙靈貺叶此
誠祈不移頃刻之間驟止滂沱之勢群山曉碧天高而屏
翳收雲六合風清日迫而羲和弄轡譔筵克脩中外同歡
今則旋整車徒爰申吊伐千軍雷動山川絕泥潦之虞萬
馬星馳戈甲耀晶熒之色佇平兇梗大拯黎元思答真官
式陳齋薦蓮燈夜簇蘭穗朝飛儀禮精嚴香花紛郁必達
清都之聖更崇紫府之勳仰叩玄功以昌鴻業不任虔祝

之至謹詞

皇帝為老君修黃籙齋詞

蓋聞混漠之先希夷之表厥惟至聖光宅九清敷澹然冲
寂之宗行不宰無為之教上自三古旁逮萬區欽若真風
贊孚成化粵自經綸之始洎膺推戴以來常慙明誠每申
瞻奉而光靈累洽禎貺繼臻仙居賜受命之符顯隆基業
宣室發祝祈之念必至感通由是風雨常均氛邪不起四
封無警百穀常登祇荷恩休宴思昭謝爰曰令序特啓齋
壇三日精嚴六時蠲潔冀憑闕奏上蒼玄功今則方命師
徒將平克醜猶資道力俾沴象巢借豐隆列缺之威掃鑿
萬貪狼之族更垂熏祐永泰稟瀛不任祝望之至謹詞

蜀州孟駙馬就衙設消災遷拔黃籙道場詞
臣聞至道深微玄功廣大包萬天而布化周品彙以流恩
故能下拯冥關廣寧邦國鎮安土地和喻神明皆遵宰制
之歡盡悅慈慈悲之力古今共稟由顯無遺臣夙奉玄休
早承皇澤未展涓埃之効驟叨符竹之榮况累掌重難兼
司刑憲詳評獄訟慮垂仁恕之規主領兵師宴寡訓齊之
要動貽遇咎常切兢憂自臨蒞郡城每懷兢慎遽鍾殃罰
敢望生全礼制所拘殞絕無所偷延視息又降渥恩泣血
籲天焚、何訴竊聞玄元設教紫陽有遷拔之儀正一垂
科黃籙有懺祈之路是敢肅嚴公署崇設齋壇拜表九清
騰詞三界伏冀三尊衆聖弘憫濟之慈夜府泉扃遂迨昇

之路賜鄭國夫人某氏魂神安泰福善資薰積過深瑕皆
送蕩滌不拘地府徑上天堂七祖九玄前亡往逝俱昇道
力齊會福庭又宅字之中累經修改恐日觸動未獲安寧
願憑齋謝之緣旁解犯違之過龍神復位土地安和居止
利宜凶災銷殄城隍社廟里域真官密享神功永居福地
上願帝圖隆固聖壽延洪太子諸王擁宏休而奉國后妃
嬪主承景貺以佳朝中外察臣六軍萬姓同歡昌運克遂
安貞歲有豐登俗無疵疢率土之內一統萬方並臻仁壽
之鄉咸奉昇平之化不任歸命披心虔誠懇願之至
邛州刺史張太博敬周為鶴鳴化枯柏再生修金籙
齋

伏聞至道玄通神功廣運裁成天地敷讚帝王羲軒融燧
之君堯舜禹湯之主莫不師資沖漠啓迪雍熙致祚曆之
厯洪俾声名之振赫或乘飈滄海或證品紫庭光燭九選
壽均三景伏惟大蜀皇帝乘樞御運握斗披元執大象而
撫華夷駕六龍而綏億兆德逾堯禹聖越羲融穹廬窮髮
之君奉賅何化靡漢渥涯之虜重譯來賓澤浸山川仁覃
草木靈禽栖于內苑嘉獸宅于上林三秀呈祥十朋表異
而猶勞謙恭己讓德于天符將溢簡編益深於撫挹今則
神明幽贊靈化垂休渥澤潤洽於朽根枝幹再榮於枯栢
風來翠壁重飄遠近之香月過華壇復覩扶疎之影其為
嘉瑞寔冠古先有以見天枝帝葉之繁昌聖壽寶圖之永

遠雖禾生清廟莫吐彤庭徒美前聞難偕聖感臣榮逢昌
運叨領郡符屬邑之中觀茲上瑞藻繪朝陳于龍闕絲綸
夕降于鳳牋旋錫御詞嚴申醮祝褒稱顯煥榮耀優隆量
息而溟海未深荷聖而乾坤難報敢曰皇帝本命之日修
金籙道場翹罄丹襟仰祈玄貺伏冀諸天降鑒萬聖昭臨
流巨福於社稷尊靈增景祐於宗祧先聖二儀並固萬國
同文皇帝壽考岷峨明齊日月普頌正朔一統寰瀛皇后
受福紫宸增齡丹籙皇太子永扶皇極恭德青宮公主嬪
妃榮匡聖日諸王百辟欽贊皇基九土安康五兵韜戢烟
塵殄息稼穡豐登動植飛沉三途六趣俱承惠渥咸詣福
庭臣誓傾忠孝之規上荅聖明之澤

廣成集卷之六

衆修北帝術醮詞

唐杜光庭撰

伏以五氣玄天北宮大帝司明善惡統御死生壽祿吉凶
 咸資校籙臣竊恐天文宿曜有臨照之災本命行年有刑
 妨之咎仰祈真聖特具修禳虔罄丹誠同伸醮禮伏乞解
 除災厄延益年齡落死籍于北酆上生名於南極公私和
 泰眷屬安寧即仰荷帝君慈祐之恩

三會醮籙詞

臣獲奉正真參受玄籙內期修鍊以保身心外冀威靈以
 禳災沴依科佩受早遂寶持但慮世務所拘塵机所役齋

戒之日朝謁有虧修行之辰香燈或闕善功未立遇咎易
彰真氣靈官未垂應祐玄司天府譴責不專三命五行災
衰未蕩旦夕憂懼冰炭在懷今以上會之辰天官考校之
日功過善惡巨細無遺是敢瀝懇披心虔誠悔過精修醮
禮拜奏章文伏惟衆聖垂慈赦其愆咎降流靈應銷解災
凶三部吏兵常加祐護動息康泰永享利貞即仰荷法籙
真官濟護之恩

軍容安宅醮詞

伏以二象既陳三靈配位陰陽陶鑄天地摧輿巢居穴處
之君澆漓未作上棟下宇之制締構云興由是取則五行
定規六紀順之則福延善著違之則禍起災生考其主張

寔惟五帝臣所居之處經始有年土木之用繼新畚鍤之
功累作竊恐上千五帝旁犯衆神又今歲興修當行年之
位則馮氏忽嬰疾苦懼曰犯觸所成輒按玄科虔申醮謝
備三天之舊格請五帝之靈符乞降正神俯流真氣永錫
安鎮俾獲乂寧凶邪不侵內外康泰疾厄蠲蕩眷屬咸和
青宮增祿祚之文黑簡息灾蒙之救克勤修奉以答神功
不任

王虔常侍北斗醮詞

臣以凡微獲逢道化常承覆祐寔荷真慈自頃以龍紀元
年奉使支郡方傳上命遽蹈禍機危懼之中真靈俯祐獲
全形命盡脫憂疑而兩地未通三年隔絕臣男延龜懇伸

禱祝累告神明天鑒誠深親承應乖仰惟至聖介此殊恩
思罄丹心克伸報謝今則上元大節啓福良期輒備醮筵
上酬明貺伏冀有臨薄禮求納菲誠荅注願于當年期降
恩于此日永當修奉以荷神休不任

馬尚書南北斗醮詞

伏聞清濁分形高卑定位南北御死生之籍陰陽有舒慘
之殊由是南斗尊神六宮衆聖紀功舉善克揚不死之文
主籙定年唯啓長生之本欲使物皆歸道人盡登真副天
尊廣濟之慈遵大道好生之理而塵波易溺意馬爭馳罪
網牢籠莫有奮飛之路情關罔閉曾無開拓之門臣跡處
人寰心拘俗役機權在握須行懲勸之文刑賞是司難徇

冲和之用慮其過咎累積陰曹更屬灾凶便為厄會雖繼
伸祈懺上和于天曹而未吐明誠仰陳於南極今則考祥
吉日崇設醮筵輒按真科盡披丹懇元：下土虔露于瑤
階昭：上真必降于瓊席敢祈哀宥俯念凡微釋罪除災
落北宮之陰簡錫年增祿上南斗之陽篇六宮永紀其姓
名五緯潛資其福祐乞使九玄七祖介福朱陵五族六姻
延祥紫府誓勤精奉以答鴻慈不任

李綰常侍九曜醮詞

伏聞二氣降和乃形品物三光布象以育群生惟茲最靈
仰承明祐至於善惡行藏動息吉凶感繫上天以司下土
臣幸承前福叨沐道風事主立身得罄忠誠之節循懷省

已常持兢慎之心祿秩所需神明是貺每增憂灼寔慮玷
危而眼疾所嬰累年為苦針藥雖至服餌益勤未獲痊瘳
倍增驚懼恐陰陽年運遇此重灾宿曜循行成其困危曾
申禱醮冀獲安寧今又身宮之中暗虛所歷當茲久疾值
此灾期啓何無門彷徨失據伏聞真科有格醮酌垂文輒
竭丹誠上希神鑒精修醮禮延降尊靈伏惟九曜威神分
光照納解其宿咎和釋冤尤銷彼災纏蠲除疾厄使紫童
守衛眼官無痛惱之侵青帝護持肝臟有安平之候凶氣
永息祿算維新敢忘修勵之誠以答炤臨之賜不任
馬尚書北帝醮詞
臣獲以凡微早聞道化栖心澹泊注念正真每展祈誠必

蒙昭祐昨以公田既闢墾麥初齊遲之春日載陽幕
之油雲未布春滋農畝正切惶輒叩玄關果垂鴻澤爐
香散處便呈潤石之容禁水巽時已變如膏之雨遂使西
成有望東作無愆可俟京坻以豐川蜀上聖之延祥既厚
下臣之報德何階虔拂翠壇式陳卑菲蘋蘩蘊藻誠非仰
薦之儀繒燭香花敢備上酬之禮伏惟采納永錫嘉祥謝
遇祈恩不敢繁啟不任
又馬尚書南斗醮詞
伏聞大聖無私隨機赴感至真下濟應念降靈變通不間
于塵凡救度豈遺於微渺臣自惟幽陋竊慕玄虛洗心依
冥漠之都潛希懺罪稽首仰鴻蒙之境冀滌前非上祈拯

拔於七玄次乞和寧於四境總披素款遽降鴻慈爰俾神
交授其嘉夢魂清氣爽全殊化蝶之時捫腹安懷有類得
較之夕固可表豐歲之兆知災息之微緬惟神功申茲景
貺競崇先次感激難勝思吞靈思重修醮禮燈吐焰參
羌玉斗之光龍霧飄香散漫瑤池之色全祛萬慮共運一
心伏惟丹府上真六宮高聖俯迴鶴轡暫降霓旌采納寸
誠哀憐末俗拂長生之金札開大宥之洪休賜其延永之
年增以自新之祿王務則三農告稔訓戒則七德申威罪
咎蠲銷公私昭暢存亡介福眷屬延生北元除錄過之書
九府錫增年之籍况漫五緯循行或逢臨照三元繫命時
有屯亨遇災生福盡之期當減祿奪年之數常情罔測揣

分懷憂非伏道慈無由自濟伏聞太上啓修禳之典天師
著祈醮之科謝罪必銷祈恩克降今以本命之日輒披正
一之文虔拜靈章式陳微醮三宮五緯咸罄誠祈六府七
元普申懺謝伏冀衆聖昭祐大聖鑒臨赦已往之過尤錫
將來之福慶三災弭息九厄蠲消壽紀潛延祿祚興益七
玄九祖超度幽扃五族六親均承道蔭公私永泰存歿康
寧即仰荷大聖罔極之恩不任
唐洞鄉本命醮詞
臣宿運所鍾遭值道化佩奉真籙獲以稟修而功業未彰
愆尤易積陰陽與候疾疹所嬰憂迫既深扣祈是切果蒙
昭祐旋獲痊平又於中元之辰欲陳黃籙之會仰告真聖

願遂丹心今則壇席克終功德成就閔盟有應風雨無侵
冥感聖慈効酬難盡敢自本命虔備科儀設微醮以展誠
拜靈章而請福伏冀高尊鑒領眾聖照臨前願已圓殊祥
下及臣罪銷厄滅業著功克奉親既保其安寧存遠必活
其遷拔永堅誠礪以答真靈不任

告修青城山丈人觀醮詞

伏以青城仙山丈人靈觀開九室而敷洞觀群岳以稱尊
自軒后錫封漢皇望秩玄宗構宇先帝增崇仙室益嚴清
壇彌肅近則良宰興葺靈宮鼎新而正寢之西猶虛隙地
邃牖之北或睹餘基玄元之像設未陳帝子之遺踪宛在
輒欲興修祖殿經始齋房永資焚謁之儀克壯清虛之境

將施畚鍤慮犯龍神敢備醮筵虔伸昭告伏惟允茲丹懇
降以玄休使功用必成上下無撓工徒安泰福善攸新不
任

嚴常侍丈人山九曜醮詞

伏聞天地分靈三官定死生之格陰陽懸象九曜垂照燭
之功南宮開延壽之符北府顯繩違之簡星纏岳瀆考校
無凡在人寰咸由統御臣自惟微薄獲奉玄慈而履行之
間恐乖陰騭運心之際未合神明曰遇災凶復兼愆咎遽
成厄會莫遂懺祈今年中宮則天符所臨身位乃土星對
照大運猶居於劫殺飛旗又寄于行年三命五行恐逢刑
剋列星九曜更慮照臨所以輒軻未寧災危頻作非憑至

聖輿路扣祈是敢虔罄丹誠克申大醮伏惟衆聖俯降福
祥銷災咎于將來釋過尤於既往六曹司命增福算于丹
天七紀尊神介休祥於玄極公私清泰眷屬安康即永荷
衆聖祐護之恩不任

青城令莫庭又為副使修本命周天醮詞

伏聞道化宣行玄功覆載陰陽不測亭育無私由是五帝
三皇御六儀而統物天官水府司八會以持綱南宮明錄
善之科北極總繩非之品吉凶罪福咸繫靈曹竊惟全蜀
輿區華陽會府隄封八國柔服諸蕃玉帳既崇金臺寔峻
殊俗威懷則文武兼資內握雄兵申令則賞刑俱用
臣切以張某久持重柄獨運赤心上稟聖謀仰遵廟畧或

指縱貌武清蕩邊陲或恢漫城池削平疆土或誅鋤姦猾
摧挫兇豪或督課賦輿經營軍食以滋多事詎可禁刑深
虞斬決之間重輕有失目成譴咎曾未懺祈又恐三命五
行或逢衰厄明星暗曜或值臨照神道至幽常情靡達非
聞至聖難滌深瑕是敢依詣靈山修崇大醮遍天地陰陽
之府周星辰日月之宮瀝懇披心祈恩悔過伏願靈光迴
鑒除已往之愆遠惠澤下臨息將來之災否允垂嘉祐永
介福祥延壽紀于丹篇落罪名於黑籍以康川境永保群
生不任

莫庭又為川主修周天醮詞

伏聞元聖開光高尊俯化澤周品彙慈覆萬天懸罪福之

明科標死生之大法上惟邦國下及人臣同歸統御之門
咸宜宗沮勸之訓古今不紊纖芥無遺臣伏念佐聖立功
非賢不濟扶危拯難非德靡先節度使王其義貫神明忠
衛社稷耀武畧而先朝返正鼓神化而令聖理平用是茂
勳錫茲巨鎮其間或尅收宮禁誅蕩妖光秦甸行師褒川
振旅廓清庸蜀底定天彭外靜邊方下戢姦暴蓋不待已
未能去兵至乃宣天子之威用將軍之鉞無非仗順必在
為時尚慮故殺誤傷同成冢咎天曹地簡或紀愆違又恐
宿曜所臨行年有厄曆運衰否分野灾凶須備懺陳以期
昭洗臣叨居寮屬輒按經圖仰罄丹誠恭申大醮潔禮頌
于仙嶽奉榛精於靈壇上扣虛無極諸天而禱祝旁周海

宇俯九地以虔祈冀達精思曲流真祐願北宮赦罪南極
延生五行之否塞清銷三命之災衰弭絕壽將川廣祿興
山崇穀稼豐穰烝黎輯悅常扶聖日永福群生上願國祚
遐長聖朝寧泰戈鋌自息文軌大同三光順度於上玄萬
類繁昌於下土幽明異趣水陸殊階咸沐真慈共臻鴻澤
不任
莫庭又周天醮詞
伏以天地萬物神鬼陰陽其職敷舒道化極育群生北極
西宮束刑章而定罪南躔東府播含春以宣功粵自帝王
洎諸臣庶咸歸率執以判吉凶臣夙荷福日叨塵官籍蹈
艱危之路當戈甲之秋一從戎旃再居名邑而疆陲遐邇

征稅繁豐寬柔則徵督與功剛峻則疲羸有怨類驅難而
豈易願馴雉以殊難况未洽和平猶資刑賞雖絕私自勵
惟理是從尚慮重輕或乖中道深憂故誤遂結瑕疵又恐
辰曜所臨行年所歷日其厄滯以構災衰境麗仙山雲藏
真觀洞包雷雨地集龍神仰靈都于罔象之中願披丹懇
瞻玉相于相霞之表必降玄慈是用按靈寶舊科設周天
大醮普九圍之官府遍十極之威神拜手歸依傾心祈懺
洪纖罪目今昔愆違未兆之災將來之咎並期蠲赦曲賜
消穰衆厄清夷宿寬和釋更增微祿俾遂遐年九祖超昇
三途開泰臣一家骨肉兩地親緣早獲團圓俱賜貞吉頃
日修造慮有侵傷冀獲安寧共貽祥祉當境曜所臨輒罄

懺祈之懇爰曰本命恭備醮筵備香火以貢誠列星燈而
展禮所冀希夷至聖俯鑒丹心九曜上尊曲流玄眈釋罪
尤於既往解厄運於將來寬債銷平凶衰除蕩更增壽福
永介祉祥眷屬又安公私和泰不任

丈人觀畫功德畢告真醮詞

伏以青城仙山丈人靈觀久無營葺近再修崇既畢巨功

爰徵繪事輒于廣殿圖肖真儀鶴貌雲容疑謁潛虛之府

瓊姿淑態似來澄碧之宮莞尔可瞻肅然如在必冀降靈

威於水滄流福澤於人寰克展醮祈仰希鑒祐無任

畫五嶽諸神醮詞

伏為丈人觀久為荒毀近畢脩營土木之役既興粉繪之

功是設爰於閔殿圖貌靈儀翠雲丹錦之袍玄璧黃琮之
罍星景日精之呂五華七稱之殊二駟六馬之車雲翼霞
耕之輦儲副二職佐命八山嶽君水帝之儀漢女河侯之
列山林孟長沼沚實司帝王威秩之曹典策所封之位或
傍司海裔東距方諸或別領洞天西隣崑嶠莫不振揚雷
電嘯嘒蛟螭按察幽明掌鏡川澤贊大上正真之理宣帝
王亭育之恩歆彼六氣成乎大化比秋冬春夏遵時令以
要虧風雨雪霜均歲功而不爽俱奉軒轅之命皆持宰執
之權與岳瀆衆靈供上司之職則希夷真君居大尊之重
當臨御之嚴頌序朝宗所宜森列今則揮毫匠手彩布循
垣燦若星陳轟如雲擁由是宏裾褭袖玉釵珠旒火佩含
星瑤珞歛月成瓊顏藉袖若辭姑射之峯異狀竒姿似炤
潯陽之浦丹青式備絢煥如生固當契彼神明藁茲福祉
上扶邦國旁祐黎元調十雨五風以登稼穡普九州六合
以致雍熙洪圖齊日月乾坤玄化匝氐蠲動植虔修醮酌
恭馨祝祈佇降威靈允孚禎貺謹詞

星瑤珞歛月成瓊顏藉袖若辭姑射之峯異狀竒姿似炤
潯陽之浦丹青式備絢煥如生固當契彼神明藁茲福祉
上扶邦國旁祐黎元調十雨五風以登稼穡普九州六合
以致雍熙洪圖齊日月乾坤玄化匝氐蠲動植虔修醮酌
恭馨祝祈佇降威靈允孚禎貺謹詞



